


妙法蓮華經指掌疏

卷一之上

BQ
2057
T85
1749a
v. 4



法華指掌疏卷一之上

賢宗後學通理述
嗣法門人明遠較字

京西潭柘山岫雲寺監院比丘來琳督刊

九總釋名題

名以顯實。題以標宗。故於未解經前而總釋之。謂總釋全經之義於名題

也。又名謂能譯人名。題謂所譯經題。今並釋之。故云總釋。二一經題二譯人

初

妙法○蓮華○經

上二字直顯法義。妙者當體得名。非對麤言妙。若對麤言妙。則妙有分限。非圓妙故。又妙者本來自妙。非先麤後妙。若先麤後妙。則妙有始終。非常妙。

故釋義則甚深無量難解難入曰妙。又惟佛與佛
乃能究盡曰妙。又聲聞辟支所不能知曰妙。經云
止止不須說。我法妙難思。故題中以妙字冠法。法
卽今經以實相爲體。以軌持爲用。實相爲體者。以
七軸雄文。皆如來自一乘實相中演出。一言一句
無非顯示一乘實相。故爲體也。軌持爲用者。軌謂
軌生物解。持謂任持自性。軌生物解者。謂一切衆
生本具實相之體。但以昏於無明。閉於權宗。勝解
不生。入證何由。佛以此法開方便門。示真實相。俾
衆生借教觀心。因指見月。是爲軌生物解用也。任

持自性者。謂一切衆生。本惟一乘佛性。第以根有利鈍。或有厚薄。乘裂爲三。性流爲五。佛以此經。開顯會歸。俾三乘同歸一乘。五性還復一性。是爲任持自性用也。然此上釋義。雖就本經。法言猶濫。諸會故冠以妙字。揀之。顯諸會不得名妙也。若論此法。普收諸會。本不可揀。故前云。非對麤言妙。今又云。揀者。正以普收諸會。揀彼諸會。不能普收。乃不得已而揀之。仍不違不揀義也。又此法稱妙者。依經文略示四義。一。權實相卽故。經云。諸佛所得法。無量方便力。而爲衆生說。又云。我設是方便。令得

入佛慧。上三句卽實而權。下二句卽權而實。以諸會多不能相卽故。二本迹相通故。經云。我常住於此。以諸神通力。令顛倒衆生。雖近而不見。又云。時我及衆僧。俱出靈鷲山。我時語衆生。常在此不滅。上四句本通於迹。下四句迹通於本。以諸會多不能相通故。三理事無礙故。經云。是法住法位。世間相常住。是法指一乘實相。理也。法位指諸法自位。事也。世間相指有爲法。事也。常住指無爲也。法理上句理不礙事。下句事不礙理。以諸會多不能無礙故。四因果交徹故。經云。世尊於長夜常愍見教化。令種無上願。又云。我今無復疑。安住於佛

道方便爲侍者。上三句因徹於果。下三句果徹於因。以諸會多不能交徹故。然此四義總屬理事無礙法界。至於放光現瑞。湧塔變土地。涌現神等。又屬事事無礙。不可思議之境。卽妙亦不可言。不得已強名曰妙也。問。儒教聖人。惟以中庸之道示人。猶曰民鮮能久矣。今經題首言妙。豈不動人驚駭。阻人勝進乎。答。妙之一字。正爲起人羨慕。激人進修耳。果能直下承當。驀地回頭。則妙法非遠。原在日用動用中也。○蓮華二字。借喻發明。古德有取青蓮釋者。有取白蓮釋者。有取香水海中菡香幢釋者。今據本經文義。當以優曇鉢華釋之。以此華乃與文義相應故。經云。如是妙法。諸佛如來時乃

說之。此二句與妙法二字相應。次云。如優曇華時。一現耳。此二句與蓮華二字相應。且此經文是身子三請之後。如來開章之語。故知如是妙法。指一經之全體。優曇鉢華。舉一經之總喻。取斯釋題。庸何議焉。若釋義有二。一翻靈瑞。以此華不開則已。開則有佛出世。爲聖靈之瑞故。般泥洹經云。閻浮提有尊樹王。名優曇鉢。有實無華。若有華者。必是金色。乃有佛出。以此名爲靈瑞華也。亦云瑞應。以此華不現則已。現則有輪王出世。爲聖王之兆故。施設論云。統瞻部洲。有輪王路。廣一踰繕那。無輪

王時海水所覆。若輪王出海水。減一踰繕那。此路皆現。優曇鉢華。同時而生。以此名爲瑞應華也。此二皆屬義翻。若以色類翻者。當云金蓮華。金色已見泥洹。欲知云何是蓮華者。準諸經有四種蓮華。一曰優鉢羅。色青二曰拘勿頭。色黃三曰鉢頭摩。色赤四曰芬陀利。色白今優曇鉢。與優鉢羅梵音相似。其不全同者。或卽金色青色之異。取此爲喻者。依本經。謂此華非時不現。必時至方現。喻此法非時不說。必時至方說。故準泥洹略開爲三。一此華名尊樹王。喻此法爲諸經中王故。二此華有實無華。華必

金色。喻此法純談果體。間說因行。行必契真故。三
此華不開則已。開則必有佛出。喻此法不說則已。
說則授記成佛故。準施設亦有三義。一此華出輪
王路。喻此法惟佛乘方有故。二此華與路同現。喻
聞此法者。卽到佛地故。三此華惟供輪王遊觀。喻
此法惟供法王受用故。此上七義。皆總喻全經。以
妙法原屬全經之名。蓮華亦唯全經之喻。若經中
之別義。臨文自有別喻。茲不預焉。問。優曇旻旻。旻旻是蓮華。題中何不存
梵。經中何不易華。什師何不譯爲靈瑞。古德何不
翻爲蓮華。疏序通經中。何亦註爲方華。卽果答。題
不存梵者。示種類故。經不易華者。示尊重故。什師
不譯靈瑞者。以靈瑞之名。此方所無。置之題中。恐

人不識爲喻故。古德不翻蓮華者。以雖是蓮華。不同常途。約義而翻。欲人知其殊勝故。疏序通經。註爲方華。卽果者。以彼不過畧出義相。不暇詳辯。姑且隨順常途解釋。亦不欲盡廢古釋之意。至若名題。闊乎一經。可不辯哉。可不辯哉。○經字結出詮體。梵語修多羅。

此云契經。契謂上契諸佛之理。下契衆生之機。經有多義。束之成四。一曰貫。謂貫穿所應知義。二曰攝。謂攝持所應度生。三曰常。謂三世不易。四曰法。謂十界同軌。今不言契者。以此方聖教。但稱爲經。順此方故。又契字是用。經字是體。舉體該用故。又妙法蓮華。旣屬所詮。自具契合之用。不待言故。統論此題。乃金口所宣。法喻爲名。合能所兼體用。該

通別貫虛實故名妙法蓮華經焉。經題竟。附釋卷次。卷

第一。

卷者對舒而言。謂舒之以便誦持。卷之以便供奉也。上古經書多以軸爲卷。今易制未易其名耳。第謂次第一首數也。經凡七卷。以次第論。此卷居初。故云第一。後皆準知。

二譯人

姚秦○三藏法師○鳩摩羅什○譯

姚秦標時。註見序文。○三藏法師顯德。三藏謂經律論也。藏有二義。一者含藏義。謂經詮定學。律詮戒學。論詮慧學。各能含藏等流義故。二者出生義。謂經契一心。律軌三業。論揀邪正。各能出生等流用故。法師亦二。一自利。謂博通三藏聖法。奉爲師

承故二利他。謂傳演三藏聖法。師範人天故。○鳩摩羅什出名華梵實錄。俱見序文。○譯之一字紀事。譯謂翻譯。考周禮掌四方之語。各有其官。北曰譯。南曰象。東曰寄。西曰鞮。今經西來。而云譯者。以漢時北官兼善西語。佛法初來。因稱爲譯。後皆仍之。然譯主承願受囑。爲法忘軀。自弘始三年入長安。在逍遙園譯諸經論。凡三百九十餘卷。此經居內。洎十五年臨終誓曰。吾所譯諸經。果不謬佛意。當焚身之後。舌根不壞。後果如之。是知師舌與諸佛出廣長舌。讚嘆此經無異。且是約義翻經。深契

時機。此經流通不盡。譯主惠澤無窮。因標經首。以示來學。總釋名題竟。

十別解文義三

一叙分二正宗分三流通分三

此分者。始於道安。證於親光。蓋以經無豐約。皆具乎此。依此科經。如首身足各有分齊。不相紊亂。故稱彌天高判。今古通遵。乃初叙者。叙一經之來源。彰諸經科判之所出始也。初說法之由致。於中有品題。有經文。品題云。

妙法蓮華經序品第一

先標經題。次出品題者。以品雖別。以類聚。總屬經攝故。又依經彰品。俾別行者。知所屬故。序與叙同。有三義。一叙列。列賓主依正之次第故。二叙述。述

興化起教之源由故。三叙引。引正宗應說之妙義。故品類也。謂一類相隨之文。別爲一聚。便受持也。準諸經品題。或如來自唱。或結集建立。或譯人添足。今經藥王天授二品。是如來自唱。以文有明言故其餘俱未可定。若今品者。似屬譯人添足。以結集者但叙其事。未必卽命其名故。第者節目之次。一者貫數之始。經凡二十八品。按節目次第。此品爲始。故以第一標之。經文分二

一六緣證信序二一光發起序

初六緣者。信聞時主處衆也。

闕一則大教不興。故古德判爲六種成就。云證信者。以賓主依正。能所分明。證是佛說。令人生信故。

亦名通序。六種成就。諸經通有故。亦名經後序。以是說經之後。結集建立故。結集建立。有意有因。建立之因者。按龍勝論云。佛將入滅時。阿難悲哀。阿尼樓豆謂言。汝是持佛法人。當咨問後事。難曰。云何後事。豆言。汝問佛滅度後。我等以誰爲師。依何而住。惡性比丘。云何調伏。結集法藏。經初當置何語。阿難承教。一一咨問。佛依問而答。我滅度後。汝等以戒爲師。依四念處住。惡性比丘。默而擯之。一切經初。當置如是我聞等語。由是凡屬佛經。皆置此語。無此語者。悉屬僞造。建立之意有三。一斷疑。準智度論。佛滅度後。衆請阿難登座。結集法藏。感身相好。同佛衆起。三疑。一疑世尊重起。二疑他方佛來。三疑阿難成佛。一唱此語。知是結集法藏。三疑頓斷。二息諍。以阿難與衆德業頗齊。若不推尊從佛。恐興諍論。一唱此語。顯是授受有源。羣諍自息。三異邪。以西域外道經初。置阿憂二字。阿翻爲無。憂翻爲有。意謂諸法雖多。不出有無。斷常之見。大抵如是。今置此語。顯是出世正法。據異邪經。

分二 一總明五緣二別列聽衆 初

如是○我聞○一時○佛○住王舍城耆闍崛山中。
如是信成就。爲順此意。卽作信順之詞。以信則言。
是事。如是不信。則言不如是。故華嚴云。信爲道元。
功德母。長養一切諸善法。故首叙之。又如是者。許。
可之詞。佛地論云。結集時。諸菩薩咸共請言。如汝。
所聞。當如是說。傳法菩薩便許可言。如是當說。如。
我所聞。云。又如是者。指法之詞。有能指所指之。
別。能指卽結集之人。所指卽結集之法。結集之人。
有二。如纂靈記云。摩訶衍藏。是文殊師利與阿難。
海於鐵圍山間結集。所指之法。有事有理。事則能。

詮虛文。從此以後。直至作禮而去。皆如是之事。理則所詮實相。經云。是法不可示。言辭相寂滅。又云。是法住法位。世間相常住等。皆如是之理。若事若理。總屬此法。故不別指。直言如是。若連下釋之。是結集者。對衆標唱之語。蓋謂如是之法。我從佛聞也。○我聞。聞成就。謂成就雖在信順。臨斯實賴音聞。不有音聞。教體何立。故楞嚴云。此方真教體。清淨在音聞。釋義。則揀別賓主。曰我。聲來達耳。曰聞。合論。則是結集者。自謂耳提面命。親從佛聞。非私淑讀古者比也。又從凡至聖。說有四我。一凡夫徧

計。二外道宗計。三諸聖假我。四法身真我。今就文殊與阿難海。應屬後二。以無徧計及邪計故。聞謂耳根發識。廢別從總。故云我聞。若以今經圓義釋之。我卽生佛平等之我。聞謂一卽一切之聞。經云。世尊甚希有。令我念過去無量諸佛法。如今口所聞。○一時時成就。謂臨期雖在音聞。說聽全憑佳會。不有佳會。大法難弘。故古德云。世事合會。尙待昌期。大法弘宣。豈違佳運。釋義則一者始終究竟之謂。時者遷流轉變之義。合論則說無異座。聽無異席。說聽事畢。一期究竟。名爲一時。又時乃不相

應法。或否。或泰。俱以時稱。今云一者。揀非否也。以
否則不能究竟。不得稱一故。不云年月日者。以如
來說法。通乎上下。

謂天上人間也

滅後結集。達於遐邇。年

月日紀。難以對同。故總以一時該之。若就當經。則
日沒還照之時。教到機熟之時。經云。今正是其時。
時爲如實說等。○佛主成就。謂說法雖憑佳期。御
衆必推教主。不有教主。群機何歸。故序云。靈嶽降
靈。非大聖無由開化。具足應云。佛陀耶。此翻覺者。
謂自覺覺他。覺行圓滿。又覺分能所。能覺之人。有
通有別。通則十方三世。諸正徧知。別則高會教主。

釋迦牟尼所覺之理。有淺有深。衆生在纏。名本覺。
三乘出障。名始覺。諸佛究竟。名圓覺。卽古德所謂
平等大慧是也。若明佛身者。隨機所見。差別不同。
今依當經。應是三身圓融。無障礙法界之身。經云。
深達罪福相。徧照於十方。自他受用微妙淨法身。法性具
相三十二。變化又云。我分身諸佛。在於十方。今應當
集等。非一非多。無障無礙○住王舍等處。成就。謂御衆雖推
教主。際會必依宏方。欲彰妙詮。豈違玄境。故華嚴
無礙。尚依七處標名。涅槃圓極。仍用雙林表法。住
卽安住之義。佛本無住。亦爲物示軌耳。城名王舍

者。準大論。昔有駁足國王。與千王共立舍宅。築城於山故。山名耆闍崛。此翻鷲峯。多鷲棲峯故。亦名鷲頭。形如鷲頭故。正名靈鷲。以先佛後佛。皆居此山。佛滅羅漢居之。法滅支佛居之。支佛滅鬼神居之。皆聖靈所居故。山城並叙者。互相依故。大成云。此城此山。衆見不一。或見土木草石。或見衆寶莊嚴。或見諸佛遊行。本經亦云。於阿僧祇劫。常在靈鷲山。又云。大火所燒時。我此土安隱等。明知此山此城。非人間思議境矣。至若寶塔品中。三變淨土。又卽於此山此城。儼然湧出華藏界也。若中字者。

不過的指佛在此處。不須玄解。總明五緣竟。

二別列聽衆

此科卽衆成就。謂際會雖賴宏基。

起教還須英才。若座無知音。說將誰聽。故古德云。
子期不遇伯牙絕絃。於中分二。一分科別列二。
敘儀總結。初三。一三乘交叅。二八部該羅。三
檀衆俱至。初四。一詳列無學。二畧述有學。三
總陳尼衆。四廣明菩薩。初三。一舉類標數。二
明位嘆德。三指名總結。初
與大比丘衆。○萬二千人俱。

上句舉類。與猶共也。顯聞非一己。大揀有學。顯衆

是無學。又大有三義。一位尊。皆是羅漢。諸漏已盡。故。二德隆。逮得已利。心得自在故。三望重。人天景仰。衆所知識故。比丘名翻三義。一破惡。謂戒防形非。定除心亂。慧悟想虛。能破見思故。二怖魔。謂既破見思。將出三界。魔恐失黨。驚怖不安故。三乞士。謂既稱破惡。又名怖魔。當離邪命。乞食自濟故。乞而稱士者。以爲成道業。應受此食也。亦云除饑。謂衆生福薄。常受饑饉。比丘乞食。能生福力故。又比丘有二。一聲聞比丘。二菩薩比丘。今據迹論。仍屬聲聞。但與向不同。如四子信解偈云。我等今者。真

是聲聞。以佛道聲。令一切聞。蓋名同而實異耳。衆
者和合之稱。梵語僧伽。此云和合衆。和合有二。一
事和。謂戒見利身口意六事俱和故。二理和。謂同
證擇滅無爲法故。若依今經。理合則實相平等。事
和則萬二同聞。文無和合者。不和非衆。稱衆必和。
不言可知故。○下句標數。萬二千人。指現會受記
之衆。準正法華云。比丘一千二百。蓋是但標常隨。
什師以最後極談。無論雲集常隨。均蒙授記。俱宜
詳列。故爲改譯。問。上根受記。身子一人。中根受記。迦葉等四人。下根受記。樓那等一
千二百。今云萬二千人。指現會受記之衆。何所憑
耶。答。豈不聞法師品初。如來廣記云。於佛前聞妙

法華經一偈一句乃至一念隨喜者皆與俱同也。授記據此則三根受記之外實繁有衆矣。謂同聞斯法揀非私傳暗授者比也。舉類標數竟。二明位嘆德。二一明位二嘆德。初皆是阿羅漢。○諸漏已盡。

上句約證明位皆是者。位德相等無別衆之非也。阿羅漢亦翻三義。一殺賊。卽前破惡果也。言比丘以三無漏學對破見思。如用兵捉賊。今則盡斷。如賊已殺故。二不生。卽前怖魔果也。言比丘將出三界。魔怖失黨。今則永離。不復再生故。三應供。卽前乞士果也。言比丘乞食資身爲成道業。今道已成。

應受供養故。又此經羅漢亦與向不同。如四子信解偈云。我等今者。真阿羅漢。於諸世間。天人魔梵。普於其中。應受供養。乃似同而實異也。○下句。約斷明位。諸漏有三。一欲漏。謂欲界煩惱。二有漏。卽上二界煩惱。三無明漏。卽三界無明。因此煩惱無明。漏落三界生死。從功能立名。已盡者。永絕生死之因。於三界中得解脫也。由此二句觀之。則是衆皆證斷具足。當無學位矣。明位竟。

二嘆德

無復煩惱。逮得已利。○盡諸有結。心得自在。

上二句約證嘆德。無復者。不復更有煩惱者。界內見思。以界外塵沙。非聲聞所斷故。逮猶及得猶證也。已利卽小乘涅槃。以小乘涅槃。但自出生死。不能入塵垂手起利他行故。然此乃釋上是阿羅漢之義。正以無復煩惱。逮得已利。方入羅漢位矣。○下二句約斷嘆德。盡謂自此永絕之義。諸有者。略曰三有。廣曰二十五有。均於廣略。則曰九有。以此中因果不亡。故名爲有。卽衆生受輪處也。結之一字。若作諸有生因。便與上文煩惱相複。今解直指諸有爲結。以能繫縛衆生。不得解脫故。若離合釋。

之。當云諸有卽結。持業釋也。然諸有雖能繫縛衆生。實衆生自相繫縛。今此衆住最後身。自此永絕。故云盡也。心之一字。隨教各別。今約二乘。應指六識爲心。以彼惟依六識三毒。立染淨本故。自在者。解脫義。解脫有二。一謂斷我執。證我空。解脫分段生死。名離妄解脫。二謂斷法執。證法空。解脫變易生死。名一切解脫。今約二乘。應是離妄解脫。以未達法空。不能入廬垂手。雖曰盡諸有結。惟心自在也。然此乃釋上諸漏已盡之義。正以盡諸有結。心得自在。方極漏盡果矣。明位嘆德竟。

三指名總結二 一指名別列二結略顯廣 初

其名曰。○阿若憍陳如。摩訶迦葉。優樓頻螺迦葉。伽耶迦葉。那提迦葉。舍利弗。大目犍連。摩訶迦旃延。阿菟樓駄。劫賓那。憍梵波提。離婆多。畢陵伽婆蹉。薄拘羅。摩訶拘絺羅。難陀。孫陀羅難陀。富樓那。彌多羅尼子。須菩提。阿難。羅睺羅。

首句總標。又指徵之詞。猶言其名爲誰也。○阿若下。別列。具云阿若多。此翻最初解。名也。以如來初轉法輪。尊者先解故。楞嚴自陳云。佛問比丘。我初稱解。如來印我。名阿若多。憍陳如。亦云憍陳那。亦

云拘鄰如。此翻火器。姓也。以先人事火命族。授記在後。列名居初者。爲示權現意故。阿含云。我佛法中。寬仁博識。初受法味者。拘鄰如爲第一。△摩訶迦葉。此云大龜氏。姓也。以先輩修道。感靈龜負圖之瑞。遂命族焉。佛弟子中。同族最多。故揀以大名畢鉢羅。此云飲光。以身具光明。飲蔽餘光故。楞嚴云。我於往劫。以紫金光塗佛形像。自爾以來。身常圓滿。紫金光聚。阿含云。我佛法中。行十二頭陀。難行苦行者。大迦葉爲第一。△優樓頻螺。此云木瓜林。禱林而生故。亦云木瓜癭。胸前有癭。如木瓜故。

伽耶。此云象頭山名也。依山住故。那提。此云福生。河名也。依河住故。此三迦葉。因於毘婆尸佛法中。共豎刹杆。故感今爲弟兄。兄事火龍。爲瓶沙王師。佛現十種神變度之。遂擲火具於水。率徒五百。歸佛出家。伽耶那提。見水中漂下火具。視知其事。各率徒二百五十。詣佛得度。阿含云。我佛法中。將護四衆。供給四事。令無所乏者。優樓頻螺迦葉爲第一。觀了諸法。都無所着。善能教化者。伽耶迦葉爲第一。心意寂然。降伏諸結。精進不退者。那提迦葉爲第一。△舍利弗。具云舍利弗羅。此翻鷺鷥子。鷺

鷲母名也。其母眼目精明。如鷲鷲鳥故。尊者是其
所生。故繫以子。蓋依母彰名也。亦云身子。其母身
形端正。故尊者生身八歲。登論座。辯勝群英。出家
七日。通佛法。果證無學。阿含云。我佛法中。智慧無
窮。決了諸疑者。舍利弗爲第一。△目犍連。此云采
菽氏。姓也。因先輩居山。采菽豆而食。遂命族焉。名
拘律陀。此云無節樹。禱樹而生故。今惟標姓。恐濫
同族。故以大字揀之。尊者身遊十方。得無罣碍。曾
止耆婆之車。焚得勝之殿。攝調達而歸正法。取釋
種以藏梵天。神通彰灼。難以備陳。阿含云。我佛法

中神通輕舉飛到十方者。大目犍連爲第一。△迦旃延。此云剪剃。姓也。以先輩居山。與仙人剃髮爲姓。爲揀同族。故冠以摩訶。名文飾。謂善飾文詞。能議論故。阿含云。我佛法中。善分別義。敷演道教者。迦旃延爲第一。△阿菟樓駄。亦云阿那律陀。亦云阿尼樓豆。此云如意。因於弗沙佛時。以稗飯施辟支佛。果感九十一劫。生人天中。受如意樂。至今未盡故。亦云無貧。謂自爾以來。不受貧窮故。尊者乃白飯王子。初出家時。常樂睡眠。如來呵爲畜生。啼泣自責。眉不交睫。七日七夜。遽失雙目。如來示以

樂見照明金剛三昧。由此不因肉眼。觀見十方。精
真洞然。如觀掌果。阿含云。我佛法中。天眼徹視者。
阿那律爲第一。△劫賓那。此云房宿。初欲近佛。夜
宿陶師之家。以草爲座。佛欲度彼。化一老宿。入與
同宿。尊者推草讓之。因爲說法。卽證無學。以曾與
如來同房共宿。故名房宿。又房宿星名。禱此生故。
又胸如星房。從解得名。阿含云。我佛法中。善知星
宿日月者。劫賓那爲第一。△憍梵波提。此云牛呬。
食後虛哨。如牛呬故。準楞嚴。以往昔輕弄沙門。生
生世世。常感此報。佛恐世人不識。生謗招懣。勅令

常居天上。不許久住人間。阿含云。樂在天上。不住人間者。憍梵波提爲第一。△離婆多。此云假和合。智論云。尊者夜宿空亭。有一鬼攜屍而至。又一鬼隨來爭之。各言我持來。共決於尊者。尊者據實答之。後鬼怒。拔尊者手足而食。前鬼取屍上手足補之。二鬼相食而去。天明自思。我身眼見鬼食。却又隨我行住。逢人便問。是我身否。衆僧知其時至。乃曰。汝身假和。非已有也。尊者聞之。漏盡得道。此命名之由也。阿含云。坐禪入定。心不倒亂者。離婆多爲第一。△畢陵伽婆蹉。此云餘習。因往昔五百世

爲婆羅門。性多憍慢。今雖成道。餘習未盡。每過恒河。便呼小婢斷流。神雖爲斷。懷瞋白佛。佛令向神求懺。遂合掌向神曰。小婢莫瞋。大衆皆笑。佛言。實無慢心。乃習氣也。阿含云。我佛法中。樹下苦坐。不避風雨者。畢陵伽婆蹉爲第一。△薄拘羅。此云善容。色貌端正。故亦云重姓。因於毘婆尸佛法中。以訶梨勒果施病僧。今生婆羅門家。感五不死。一繼母置火爐中不死。二置沸湯中不死。三推落水中不死。四大魚吞之不死。五漁人獲魚。剖之不死。遂養爲己子。其父聞爭。共議兩家爲子。故名重姓。曾

於無量劫來。持不殺戒。今生一百六十歲。無少病
痛。阿含云。我佛法中。壽命極長。終不中天。端莊不
苟。常樂閒居者。薄拘羅爲第一。△摩訶拘絺羅。此
云大膝。因膝骨博大立名。尊者乃身子之舅。素辯
勝姊。姊孕身子。則不能勝。知懷智人。寄辯母口。遂
奮志遊學南天。歷十八年。讀十八經。無暇剪爪。世
稱長爪梵志。洎歸。聞身子出家。遂起慢心。云我甥
八歲。聲震五天。沙門何術。誘彼出家。及見佛負墮。
亦隨出家。阿含云。我佛法中。得四辯才。觸問能答
者。拘絺羅爲第一。△難陀。此云善歡喜。牧牛子也。

飯王俾十萬出家。尊者稱善歡喜。故以名焉。性極聰敏。音聲絕倫。初入佛法。欣道第一。△孫陀羅難陀。佛之胞弟。爲揀牧牛難陀。連妻爲名也。妻名孫陀羅。此云好愛。性多愛欲。故亦云端正。身形端正。故尊者初出家時。心常散動。如來勅令觀鼻端白。因此心開漏盡。成阿羅漢。楞嚴云。我以消息。息久發明。明圓滅漏。斯爲第一。△富樓那。彌多羅尼子。依父母彰名。父名富樓那。此云滿願。亦云滿江。其祖禱江而生。得滿其願。故母名彌多羅尼。此云慈女。樂誦圍陀典中。慈行篇。故具足應云。滿江慈女。

之子。經疏從略。多以滿慈子稱之。阿含云。我佛法中。善能廣說。分別義理者。滿慈子爲第一。△須菩提。此云空生。以初生時。其家庫藏皆空故。次以父母驚異。庫藏轉現。故亦名善現。又以忽空忽現。卜之占者。占者言。旣善且吉。故亦名善吉。常住無諍三昧。所修行業。以空爲本。楞嚴云。佛問圓通。如我所證。諸相入非。非所非盡。旋法歸無。斯爲第一。△阿難。此云慶喜。斛飯王子。調達之弟也。佛成道日。尊者始生。時淨飯王。旣聞世尊成道。又聞斛飯生子。舉國欣慶。故以名焉。昔與如來。同於空王佛所。

發心。如來常勤精進。早成正覺。尊者常樂多聞。護持法藏。阿含云。我佛法中。多聞廣達。堪任奉持者。阿難爲第一。△羅睺羅。此云覆障。佛之子也。以因中塞鼠穴六日。及不看婆羅門六日。報感處胎六年。爲胎所覆。爲宿因所障。故名覆障。本經佛自述云。羅睺羅密行。唯我能知之。故稱尊者。密行第一。然此上所釋諸聖名目。不過略準古德錄出一二。其餘過現事跡。諸註尙多。要知本地幽微。非心所測。況今經旣屬圓機。則一行卽一切行。一德卽一切德。烏可得而言諸指名別列竟。

二結略顯廣

如是衆所知識。大阿羅漢等。

如是。卽指上二十一人。以此二十一人。在人天大衆之中。凡有聞名皆知。見面皆識。故云衆所知識。又此二十一人。雖屬羅漢。皆回小向大。故云大阿羅漢。又大阿羅漢。旣揀定性。而衆所知識。仍揀萬二。言萬二之衆。雖皆大阿羅漢。未必皆爲衆所知識。今上所列。乃衆所知識之大阿羅漢也。等者。等其伴侶。主伴和合。共成萬二之數。問。阿難羅睺。準授記俱在有學。今列無學衆中。豈不與後相違。答。此有三義。一捨權從實故。準智論。阿難對迦葉云。我能有力。久可

得道爲侍佛故。故留殘結。本經亦云。方便爲侍者。護持諸佛法。據此則阿難實德已證無學。爲侍佛故。權住學地。今捨權從實。故列於此。羅睺準知。二爲破權執故。以阿難羅睺授記。雖在有學。不過引進實行。曲示權儀。執權者卽以實行目之。今爲破權執。故列於此。三名同義別故。準信解品云。今得無漏。無上大果。又云。我等今者。真阿羅漢。據此則向稱無學。對待非真。今稱無學。乃真無學。而阿難羅睺旣已了知自心。本來詳列無學竟。是佛是真無學。故列於此。

二畧述有學

復有學無學二千人。

首二字。文雖局此。義通下科。言彼時靈山一會。不獨萬二同聞。乃復有學無學若干。尼衆若干。菩薩摩訶薩等若干。正以見羽翼之多人也。學無學者。

舉有學類。以彼所證未極。所斷未竟。研真斷惑。始學無學人故。二千人者。標有學數。後文授學無學人記。卽此衆也。無明位嘆德者。旣屬有學。無位可明。無德可歎。故無指名總結者。準後阿難羅睺。乃有學受記之首。爲是權現。已列無學衆中。其餘或有或無。無足重輕。故不指名。無庸更結。然雖如是。論實德本無優劣。亦不過各據一途。以引偏好耳。幸勿執迹而昧本也。畧述有學竟。

三總陳尼衆

摩訶波闍波提比丘尼。與眷屬六千人俱。羅睺羅母。

耶輸陀羅比丘尼亦與眷屬俱

摩訶波闍波提佛姨母也。此云大愛道。因初求出

家。佛不許可。阿難代陳三請。佛勅能修八敬。方聽

出家。

八敬者。一。百歲尼。應禮初夏比丘足。二。不得

罵比丘。三。不得舉比丘過。四。應從大僧求具

戒。

五。若犯僧殘。應半月在二部僧中行摩那埵行。

六。應半月於大僧中求教授人。

七。不應在無比丘

處夏安居。

八。安居訖。

當詣大僧中求自恣。聖母爲愛道故。堪忍奉行。故

名焉。亦名憍曇彌。此云衆主。爲尼衆之主故。比丘

同前。尼翻爲女。爲別大僧故也。眷屬六千。標所與

之數。法性相親。曰眷。人事相制。曰屬。以六千尼衆

智由聖母所生。身依聖母而住。論法性有相親之

誼論人事有相制之義故。羅睺羅母佛之婦也。名耶輸陁羅。此云華色。有美色故。亦云名聞。有聲譽故。亦者例上之詞。謂耶輸陁羅。因見波闍波提。主伴和合。同入高會。故亦與眷屬俱也。不言數目者。非同尼主。眷屬衆多。無可表彰。故準後持品增記。卽此科尼衆之數。齊此以上。準常皆聲聞衆也。總陳尼衆竟。

四廣明菩薩三一舉類標數二明位嘆德三指名總結初

菩薩摩訶薩○八萬人。

上五字。舉類菩薩。半梵語也。具云菩提薩埵。此翻覺有情。有三義。一約自利。謂菩薩是能覺悟之有情。揀非凡夫不自覺故。二約利他。謂菩薩能覺悟法界有情。揀非二乘不覺他故。三約兩利。謂菩薩上求佛覺。下化有情。揀非悲智偏用。墮二邊故。摩訶薩。具云摩訶菩提薩埵。言向下所列諸聖。或帶果行因。或一生補處。如觀音文殊彌勒勢至等。非地前諸位可比。故旣稱菩薩。又以摩訶薩揀之。以是菩薩中之大菩薩故。○八萬人。標數。法師品初因藥王。告八萬。卽此衆也。問。據今解。聲聞衆中。暫爾雲集。俱在標數之內。

此菩薩衆中。地湧雲集等。何不標其數耶。答。此經正授聲聞成佛之記。故暫爾雲集者。亦須標之。若地湧雲集等。不過承虛接響。助發玄化。如非經前預至。凡因事方來。及夫未終卷而去者。槩不標其數也。二明位嘆德二。一明位二嘆德。初

皆於阿耨多羅三藐三菩提不退轉。○皆得陀羅尼。樂說辯才。轉不退轉法輪。

首句約自利明位。阿耨多羅。此云無上。法身德也。以法身豎窮三際。橫徧十方。一切諸法無過上故。三藐。此云正等。正謂方正等。謂平等。解脫德也。以解脫不爲煩惱所染。本自方正。不爲生死所遷。本自平等故。三菩提。此云正覺。正揀偏邪。覺顯明了。

般若德也。以般若能覺了諸法性相真妄虛實。揀非凡小偏覺及外道邪覺故。此是佛果三德。取以明位者。顯圓教菩薩因果該徹之義。不退轉義。有淺有深。如位不退等。今就圓教一位卽一切位。一切位卽一位。初發心時。卽攝諸位。故不退也。若以向下列名諸聖言之。復開爲二。一將證不退。如等覺補處之尊。二已證不退。如帶果行因之聖。總言此中諸聖。雖有將證已證之別。究竟皆屬不退。揀非六心墮落塵劫聲聞者比也。○皆得下。約利他明位。陁羅尼。此云總持。謂總一切法。持無量義故。

準後文名有多種。今束爲二。一有字。如陀羅尼品及普賢品。諸聖所說。一無字。只可智知。不可言辯。後云。是法不可示。言詞相寂滅。卽無字陀羅尼也。今對下文樂說辯才之句。應屬無字。正以總持得於心。樂說形於口故。樂說辯才。四辯之一。四辯者。一法無礙辯。於一切法能演說故。二義無礙辯。於一切義能分析故。三詞無礙辯。殊方異類。言詞相通故。四樂說無礙辯。隨情順欲。樂說不倦故。此四辯才。後後能攝前前。前前不攝後後。今舉後攝前。故但云樂說辯也。轉謂傳說。謂以己所得。傳說於

人故不退法者。凡有所說。皆爲一佛乘也。輪有摧
輾運動二義。法能摧滅虛妄。運入真實。故借以喻
之。又上明自利。則曰菩提不退。此明利他。則曰轉
不退輪。正謂菩薩得是道以處已。運是道以利人。
揀非欲速出三界。自求涅槃者比也。由此科之義
觀之。則八萬菩薩。皆自證不退。而入法王位矣。明
位竟。二嘆德。

供養無量百千諸佛。於諸佛所。植衆德本。常爲諸佛
之所稱嘆。以慈修身。善入佛慧。○通達大智。到於彼
岸。名稱普聞。無量世界。能度無數百千衆生。

前五句約自利嘆德。供養者。外修四事。內致一心。不達三輪體空。名事供養。如達體空。名理供養。今是理供養也。無量百千諸佛者。極顯其所供佛多。所謂不於一佛二佛三四五佛而種善根也。植者栽培之義。衆德卽佛果萬德。本猶根也。言菩薩旣供多佛。必是萬行交修。雖未卽證萬德。已培萬德之根本矣。諸佛稱嘆者。或稱其因深。或嘆其果近。如今經顯本授記之類是也。以慈修身者。借利物之行。成就已德。如今經授記之後。又復經劫行因之類是也。善入佛慧者。承上旣曰以慈。必是不捨。

塵勞。旣曰修身。必能成就佛慧。正以不捨塵勞而成就佛慧。乃不入而入。故名善入。若二乘之沉空趣寂。縱少有所得。俱墮偏枯。雖入亦不名善也。然此一節。乃釋上菩提不退之義。正以供佛之多。植德之衆。旣爲諸佛稱嘆。又能以慈修身。於諸佛慧。已稱善入。方能任運修證。而至不退位矣。○通達下。約利他嘆德。大智揀非權小。所謂一切種智是也。到彼岸者。凡事究竟之謂。不取生死此岸。涅槃彼岸之義。準正法華云。大智度無極。言菩薩旣能通達大智。其智可謂究竟無極。故云到彼岸也。名

稱普聞者。大智充於中。聲名揚於外。故無量世界。極言其聞之遠也。能度衆生者。大智充足。赴應者。廣。聲名洋溢。受化者衆。故無數百千。極言其度之廣也。然此一節。乃釋上轉不退輪之義。正以通達大智。名稱普聞。於諸衆生。已能度脫。乃可轉不退輪。而入法王位矣。明位嘆德竟。

三指名總結二 一指名別列二結畧顯廣 初

其名曰。文殊師利菩薩。觀世音菩薩。得大勢菩薩。常精進菩薩。不休息菩薩。寶掌菩薩。藥王菩薩。勇施菩薩。寶月菩薩。月光菩薩。滿月菩薩。大力菩薩。無量力

菩薩。越三界菩薩。跋陀婆羅菩薩。彌勒菩薩。寶積菩薩。導師菩薩。

首句同上。別列中文殊師利。亦云曼殊室利。此翻妙德。大經云。了了見佛性。猶如妙德等。亦翻妙吉祥。以初生時。有祥光滿室之兆。故此菩薩用周三際。化滿塵方。道成先劫。號龍種尊王。現證北方。稱摩尼寶積。未來成佛。名曰普現。在因爲八王師。在果爲七佛祖。影響大化。示同菩薩。華嚴表根本智。今經爲發起主。圓極妙理。非智莫解。故首標之。△觀世音有二義。一約智悟。二約悲化。約智悟者。觀

卽能聞根性。世音卽所觀聲塵。以菩薩觀聲反聞。得入圓通故。約悲化者。觀卽悲心赴應。世音卽稱名機感。以菩薩悲心應機。尋聲救苦故。常住普門三昧。圓現自在神通。已成正覺。過去號正法明佛。示居因門。現在爲彌陀輔翼。當補佛處。未來名普光功德。用表慈門。流通玄化。故次標之。△得大勢。卽大勢至也。思益經云。我投足之處。震動三千大千世界。及魔宮殿。故名大勢至。悲華經寶藏佛言。由汝願取大千世界。今當字汝爲大勢至。又此菩薩。以念佛三昧。攝念佛人。歸於淨土。不勞而化。故

名大勢至也。最上一乘。具大勢力。方能進取。故特
列其名。△常精進者。寶積經云。是菩薩爲一衆生。
經無量劫。隨逐不捨。猶不受化。無有一念棄捨之
心。以身心精進。故名常精進。今列其名者。蓋爲引
攝二乘。發度生心。立精進行也。△不休息者。思益
經云。恒河沙劫爲一日。夜三十日爲月。十二月爲
歲。過百千萬億劫。得值一佛。如是值恒河沙佛。行
諸梵行。修習功德。然後受記。心不休息。故名不休
息。今列其名者。蓋爲策進疲勞。成就大志。自鄙先
心也。△寶掌菩薩者。寶積經云。以何義故名爲寶

掌。謂彼菩薩。於諸佛土化衆生時。欲以右手徧捫諸佛世界。卽隨所欲而得成辦。從其手出佛法僧聲。乃至慈悲喜捨之聲。又大論云。寶掌菩薩。七寶從其手出。給施一切衆生。又令歡喜。得至涅槃。故名寶掌。然此經甚深無量。非具智慧寶手者。不能捫其邊際。因列其名以表之。△藥王菩薩者。觀經云。昔名星光。從尊者日藏邊。聞說佛慧。以雪山上藥。供養衆僧。願於未來。能治衆生身心二病。舉世歡喜。號爲藥王。過去爲喜見身。當來號樓至佛。現爲法師品中當機。用表普濟。故列其名。△勇施菩

薩者。爲欲滿足六波羅密。勤行布施。心無憒惜。乃至頭目髓腦。身肉手足。施於乞者。亦不怯弱。今列其名者。以布施率萬行之首。欲成佛果。惟此爲要也。△寶月菩薩者。借喻爲名。月以摩尼爲體。麗中天而千江現影。喻菩薩以真如爲身。朗性天而萬類顯形。今列其名者。以此經乃體用全彰。非若人不足與有爲也。△月光菩薩者。月以清涼表定。光以照耀顯慧。定慧具足。方契佛乘。故列其名。以爲有志佛道者法。△滿月菩薩者。自覺聖智圓滿。如望夜月故。然此經唯佛與佛。乃能究盡。非聖智圓

滿者。無所由明。故列其名也。△大力菩薩者。以度
生爲己任。以至果爲限期。任重道遠。不退不屈。若
斯人者。乃可續佛慧命。傳佛聲教。故特列其名。△
無量力者。用周三際。化滿十方。方際相涉。而分量
莫窮。化用交絡。而神力無限。此經之所以流通無
盡者。端賴斯人。故列其名。以爲弘經者法。△越三
界者。居塵不染。處有不繫。本爲成就衆生。旅泊三
界。權作空華佛事。實欲淨佛國土。不出一真徧現
遊戲神通。如是之人。乃可津梁末法。流通聖典。故
列其名。以爲四依之準。△跋陀婆羅。此云善守。謂

善能守護衆生。今不退轉菩提心故。思益經云。若衆生聞名者。畢竟得三菩提是也。亦云賢首功高十地。德邁三賢。爲衆賢之首故。今列其名者。表斯經必隣極之人。乃堪傳授也。△彌勒。具云彌帝利。亦云梅哩利耶。此翻慈氏。姓也。思益經云。若衆生見者。卽得慈心三昧。故稱慈氏。名阿逸多。此翻無能勝。謂位登補處。除佛一人。餘無能勝故。昔號求名。現居兜率。當作龍華主人。斯經前後兩章。皆爲發起。蓋欲借此妙法。結三會度生之緣。故列其名。俾有志龍華者。於斯經宜盡心焉。△寶積菩薩者。

什師注淨名經云。積聚智慧寶。故名寶積。火宅喻後偈云。斯法華經。爲深智說。故列其名。以爲受道者勉。△導師菩薩者。入塵垂手。弘範三界。導愚迷之衆。爲天人之師。故思益經云。於邪道衆生。生大悲心。令入正道。故名導師。然斯經貴在弘通。而弘通必依善友。故以導師之名。殿於衆聖之後焉。此上所釋諸聖名目。或從因行。或從果德。或約智悟。或約悲化。亦不過畧準古德。錄出一二。要知無學聲聞。尚非一德可局。况隣極菩薩。豈片善可罄哉。指名別列竟。二結畧顯廣。

如是等菩薩摩訶薩八萬人俱。

如是二字指上列名諸聖等統率也。菩薩摩訶薩指所統之衆。八萬人結主伴之數。言如是一十八衆。所等菩薩俱是摩訶薩主伴和合。共有八萬人也。又此中結詞與前無學科中稍異。前以等字在德號之下。故知能等者勝。所等者劣。今以等字在德號之上。故知能等所等實無優劣。然法華一會豈無新意及淺位者。但難枚其數耳。三乘交叅竟。二八部該羅。雖有內應。必假外護。故於三乘之後列八部焉。分六一天王天衆二龍王龍衆三緊那羅衆四乾闥婆衆五

阿修羅衆六迦樓羅衆 初

爾時釋提桓因與其眷屬二萬天子俱。○復有明月天子。普香天子。寶光天子。四大天王。與其眷屬萬天子俱。○自在天子。大自在天子。與其眷屬三萬天子俱。○娑婆世界主。梵天王。尸棄大梵。光明大梵等。與其眷屬萬二千天子俱。

爾時下忉利天衆。釋提桓因。此云能主。卽忉利天之主也。正量論云。因於迦葉佛法中爲女人發心。建佛塔。有三十二人助成。女人爲天主。三十二人爲列辟。所謂三十三天是也。與其眷屬標所統部。

類以天主旣集。親眷臣屬咸相隨故。二萬天子。明
眷屬數目。以子於天主。故皆以天子稱之。○復有
下。四王天衆。古德云。明月天子。卽月宮天子。普香
天子。卽星宿天子。紫微大帝。寶光天子。卽日宮天
子。此三天子。唯星宿天子。端居中天。統攝周天星
象。分司照耀。餘二天子。居須彌山腹。循環四洲。所
謂三光照世是也。四大天王者。一名提頭賴吒。此
云持國。在須彌東面。居黃金埵。統乾闥婆。富單那
二部。二名毘留勒叉。此云增長。在須彌南面。居琉
璃埵。統鳩槃荼。薜荔多二部。三名毘留博叉。此云

廣目。在須彌西面。居白銀埵。統毘闍舍毒龍二部。
四名毘沙門。此云多聞。在須彌北面。居水晶埵。統
夜叉羅刹二部。其所住處。當須彌腹。齊日月宮。各
統二部鬼神。覆護世界。不令惱人。所謂護世四王
是也。與其眷屬等。總指三光天子并四大天王。所
統部類之數。○自在下。欲頂二天。自在天子。化樂
天之主也。此天欲得五欲境時。變化自在。故以自
在爲名。大自在天子。他化天之主也。此天欲得五
欲境時。餘天爲化。自在勝前。故以大自在爲名。眷
屬三萬者。欲界勝處。眷屬亦多故。據欲界於忉利
之上。化樂之下。

更有夜摩梵率二天。今不齊此以上。總屬欲界天具者。舉上下以攝中故。

也。○娑婆下。色界天衆。娑婆。此云堪忍。五濁八苦。堪能忍受。無求出意故。王者。取在上覆護之義。準教中。一四天下。上覆初禪。則初禪爲四天下主也。小千世界。上覆二禪。則二禪爲小千界主也。中千世界。上覆三禪。則三禪爲中千界主也。大千世界。上覆四禪。則四禪爲大千界主也。據此。則色界四禪。俱稱界主。但所主有廣狹不同。如家主。邑主。國主。天下主之類。梵之一字。仍屬西語。此翻離欲。除下地繫。上升色界故。王者。統攝梵衆。於本天中得。

自在也。然既稱界主。又稱梵王者。爲顯所護之境。并明所居之位故。尸棄大梵者。初禪天王。此云頂髻。頂有螺髻故。光明大梵者。二禪天王。依正光明。勝於初禪故。等攝三四。譯文巧耳。眷屬萬二千。卽所統梵衆之數。此上更有無色一界。會亦當有。但以無色可見。故不列也。準身子受記之後。慶讚回向之語。則此中諸天。皆寄位聖賢。影響大化。豈彼凡夫天。所可同日語哉。

二龍王龍衆

有八龍王。○難陀龍王。跋難陀龍王。娑伽羅龍王。和

脩吉龍王。德義迦龍王。阿那婆達多龍王。摩那斯龍王。優鉢羅龍王等。○各與若干百千眷屬俱。

首句總標○難陀下別列難陀。此云歡喜跋難陀。此云善歡喜。兄弟二龍常護摩竭提國。風不鳴條。雨不破塊。五穀豐登。善應人心。瓶沙王歲設大會賽之。百姓聞之歡喜趨赴。故以名也。娑伽羅。此云鹹海。因依香水海外。鹹水海住故。和脩吉。此云寶稱。名聞尊重故。亦云多頭。形現多頭故。德義迦。此云現毒。噓氣毒人故。亦云多舌。形現多舌故。阿那婆達多。亦云阿耨達。此翻無熱惱池名也。阿含云。

雪山頂上有阿耨達池。池中有五柱堂。龍住其中。卽今龍王是也。摩那斯。此云大身。亦云大力。修羅與帝釋戰。排海水淹善見城。此龍縈身以遏海水。因得名焉。優鉢羅。此云青蓮華。池名也。龍依池住。故等者。總該不盡之數。準請雨經。有八十四億那由他龍王。今雲集高會者。豈止於八。故以等字該之。○末句總結。準海龍王經。有光耀龍女。與二萬海神。佛記當生無怒佛土。海龍王受決。當成無垢淨佛。今經亦有八歲龍女。頓證南方。則此衆深本。豈可測量也哉。

三緊那羅衆

有四緊那羅王。○法緊那羅王。妙法緊那羅王。大法
緊那羅王。持法緊那羅王。○各與若干百千眷屬俱。
首句總標。緊那羅。帝釋法樂神也。亦云真陀羅。此
翻疑神。人身而有一角。似人非人。見者生疑。故佛
說法時。諸天絃歌而頌法門者。卽此神也。○次句
下別列。法緊那羅。奏四諦法者。以四諦有軌持義
故。妙法緊那羅。奏十二因緣法者。以因緣法較之
四諦爲盡善故。大法緊那羅。奏六度法者。以六度
法揀小乘故。持法緊那羅。總奏前三法者。以一音

普咏諦緣六度。有總持義故。○末句總結可知。

四乾闥婆衆

有四乾闥婆王。○樂乾闥婆王。樂音乾闥婆王。美乾闥婆王。美音乾闥婆王。○各與若干百千眷屬俱。

首句總標。乾闥婆。帝釋俗樂神也。亦云乾陀羅。此翻嗅香。亦翻香陰。以此衆嗅香爲食。以香資陰故。○次句下別列。樂乾闥婆。舞干羽者。如庭列八佾之類。樂音乾闥婆。歌律呂者。如聲叶五音之類。美乾闥婆。較前樂乾闥婆。猶爲盡美。蓋舞之精而妙者。美音乾闥婆。較前樂音。猶爲盡美。蓋歌之和而

雅者。○末句總結。然此上二部。或是內祕實德。外現權相。或是多生有緣。得預高會。俱未可定。

五阿修羅衆

有四阿修羅王。○婆稚阿修羅王。佉羅騫陀阿修羅王。毘摩質多羅阿修羅王。羅睺阿修羅王。○各與若干百千眷屬俱。

首句總標阿修羅。亦云阿素洛。此翻無端正。以此類有端正女。無端正男故。亦云非天。以此類福報似天。位德非天故。準楞嚴說有四種。一卵生。於鬼道中。以護法力。乘通入空。從卵而生。屬鬼趣攝。二

胎生。於諸天中降德貶墜。其所卜居。隣於日月。從胎而出。屬人趣攝。三化生。執持世界。力洞無畏。能與梵王帝釋爭權。因變化有。屬天趣攝。四濕生。生大海心。沉水穴口。旦遊虛空。暮歸水宿。因濕氣有。畜生趣攝。今經修羅。或亦四種俱有。若列名者。似屬天趣。亦兼人鬼。○次句下。別列婆稚。此云被縛。與天帝戰時。曾被縛故。佉羅騫隄。此云廣肩。兩肩寬廣。排海水淹。善見城者是也。毘摩質多羅。此云種種疑。心思天位。疑慮多端故。亦云淨心。歸佛受化。其心乃淨故。卽天帝如舍脂之父也。羅睺。此云

障日。與天帝戰時。能以手障日故。○末句總結。

六迦樓羅衆

有四迦樓羅王。○大威德迦樓羅王。大身迦樓羅王。大滿迦樓羅王。如意迦樓羅王。○各與若干百千眷屬俱。

首句總標。迦樓羅。亦云迦留羅。此翻金翅鳥。其翅金色故。俗稱大鵬。兩翅相去三百六十萬里。披海水以食龍者是也。莊生云。其翼若垂天之雲。蓋擬此耳。○次句下別列。大威德者。威懼諸龍。德遵佛化故。大身者。身超群輩。莊生所謂鵬之大。不知其

幾千里是也。大滿者。自大自滿。小視群輩故。如意珠名。頸有此珠。卽以爲名。○末句總結。然此以上二部。於法師品初。亦蒙廣記。應是多生有緣。攝歸正法。得入高會者也。準後文如來放光之前。身子受記之後。法師廣記之初。更有夜叉。及摩睺羅伽二部。此中亦當有之。蓋譯者畧之耳。科云八部者。約義立也。八部該羅竟。三檀衆俱至。韋提希子。阿闍世王。與若干百千眷屬俱。

韋提希。乃頻婆娑羅王之婦。阿闍世王之母也。此云思惟。因闍王害父。厭離娑婆。依佛所說十六觀。

經存想西方。思惟往生故。阿闍世。此云未生怨。未
生之時。相師占曰。生必害父。故名以誌之。既生。父
令升樓。撲之不死。惟損一指。故亦名無指。長信調
達之謀。閉父於獄。自主王舍。其母以善言感悟。甫
開門請父。其父已死。闍王自知逆罪。乃歸佛求懺。
今欲假母善。以掩子惡。故曰韋提希子。母實未來。
惟是子來。故曰阿闍世王。其逆罪因緣。詳出涅槃。
非今所急。不錄。末句。明所統之衆。人王既出。人民
載道。兼之宮眷臣屬。其數不知有幾。故云若干等
也。科以檀衆者。雖有王眷之分。既到佛地。咸稱施

法華指掌疏
主故。問。佛在人中說法。人衆何其少耶。答。文畧不載。人實不少。準無量義經。列四輪王。復有國王國臣國民士女。今經後文亦云。及諸小王。轉輪聖王等。其廣可知。分科別列竟。

二敘儀總結

各禮佛足。退坐一面。

首句請法之儀。三乘八部等。不會而同。故云各禮佛足。下句聞法之式。既禮足已。分班就座。故云退坐一面。非大衆俱在一面也。又各禮佛足者。表以權就實。會三歸一之義。退坐一面者。表同受果記。異界取證之義。六緣證信序竟。

二一光發起序

一光。卽眉間毫光。法華大教。從此而興。故云發起序也。又此序亦名

別序。別在當經故。如大彌陀以世尊色變發起。首楞嚴以慶喜墮淫發起。隨經各別故。亦云經前序。以是未說經前問答。分四。一顯相逗機。二放光弄引。發起教端故。

東照三會衆騰疑四問答發起

初

顯相者。未放光前。先顯四

相。一說經。二入定。三雨華。四動地。蓋以會衆時至緣熟。大機將發。故現此相以逗之。所以會衆有歡喜合掌。一心觀佛。憤憤悱悱之狀也。分三。一說經入定。二雨華動

地。三大衆喜觀

初

爾時世尊。四衆圍繞。供養恭敬。尊重讚嘆。爲諸菩薩。說大乘經。名無量義。教菩薩法。佛所護念。○佛說此經已。結跏趺坐。入於無量義處三昧。身心不動。

初衆集說經。爾時者。法會大衆。各禮退坐時也。世

尊者。十號之一。爲三界師。作四生父。世出世間所
尊重故。四衆者。卽出家二衆。在家二衆。以三乘八
部等。詳分雖有種種差別。總論不出僧俗四衆故。
又古德於一衆之中。更開爲四。一者權謀智鑒。知
時知機。爲發起衆。如彌勒文殊等。二者緣合時熟。
聞卽得道。爲當機衆。如身子迦葉等。三者帶果行
因。匡輔法化。爲影響衆。如觀音普賢等。四者過去
根淺。現在不解。爲結緣衆。如隨喜成因等。據此則
但標四衆。卽攝一切衆也。圍繞者。前後左右。簇擁
法王。如萬派朝宗。群星拱北之狀。又前云退坐。此

云圍繞者。乃將行供養。重整威儀之義。供養者。借物表誠。總通三業。恭敬者。具儀傳心。別屬身業。尊重者。志念專注。別屬意業。讚嘆者。頌稱德業。別屬口業。準無量義經。供養有天香天衣等物。恭敬有合掌叉手等儀。尊重有一心瞻仰等語。讚嘆有大哉大悟等偈。無非極顯爲法之誠也。爲諸菩薩者。所被之機。揀非二乘。說大乘經者。能被之法。揀非小道。又三乘同會。獨爲菩薩說大者。正令二乘耻小慕大。所謂斑鳩樹上啼。意在蔴畬裏也。名無量義者。彼經佛自釋云。無量義卽一法也。其一法者。

所謂無相。

此明無量爲一。一亦不可得故。

無相不相。

此釋無相之義。蓋以相與

不相俱無。乃真無相也。

名爲實相。

此句出體。正以真無相故。一切莫壞。是爲實相理也。

從一實相。生無量法。所謂二法三道四果。

此明一爲無量。

若權實二法。若三乘道理。若四聖果位。皆從此生故。

據此則無量義經亦以

實相爲體。以此體能攝能生一切諸法。故名無量

義。教菩薩法者。非機不演。佛所護念者。非時不說。

蓋恐授受非人。生謗招僊。展演不時。反失利益。今

經所謂久默斯要。不務速說者。亦斯意也。○佛說

下。說畢入定。已者對機而言。以經本無已。成益斯

已耳。結謂交相盤結。半坐曰跏。跏加也。謂先以左

足加於右膝。全坐曰趺。趺復也。謂次以右足復於左膝。此入定之儀也。又坐必跏趺者。畧有八益。一對治掉舉。二對治昏沉。三對治散亂。四破諸魔軍。五生他敬心。六天人適悅。七非世受用。八不共外道。往古諸佛。盡行此法。今佛亦然。故云結跏趺坐。無量義處。標定名也。夫義旣無量。卽無處所。亦無出入。今約智與理冥時。一切法義。悉皆現前。義言處及入耳。三昧。此云正定。不共外道。非彼邪定。故亦云正受。不共凡夫。非世受用。故身心不動者。外肅形儀。內斂心神。所謂身體及手足靜然安不動。

其心常憺怕。未曾有散亂也。說經入定竟。

二雨華動地

是時天雨曼陀羅華。摩訶曼陀羅華。曼殊沙華。摩訶曼殊沙華。而散佛上。及諸大衆。○普佛世界。六種震動。

初天人興供。由上聞佛說經。已蒙教益。見佛入定。復冀進聞。故雨華興供。以明謝前請後之意。是時卽說經入定時也。曼陀羅華等。舊翻小白大白。其色白故。新翻小適意。大適意。謂香色具足。適可人意故。曼殊沙華等。舊翻小赤大赤。其色赤故。新翻

小柔軟大柔軟。謂艷麗輕嬌。柔軟可愛。故散佛及衆者。供主以及伴也。若作表法。釋者華表。知見四者。表住行向地。開示悟入。言衆生知見本具。如華本天成。奈久隱情識。如色香不現。今將開示悟入。故以天雨四華表之。散佛及衆者。表開示悟入。因果該徹之義。○普佛下地祇變相。言上來說經入定。原爲引發大心。其奈二乘人等。竟如不見不聞。故動地變相。以示觸目驚心之意。普佛世界者。準後彌勒偈云。而此世界。蓋指一佛化境言也。六種震動者。古德釋云。隱隱有聲曰震。砰磕發響曰吼。

令物警心曰擊。此三皆聲。總名爲震。搖颺不安曰動。自下升高曰起。埵壠凹凸曰湧。此三皆形。總名爲動。合云六種震動。又六種之中。各開爲三。如一方名動。四天下名徧動。大千界爲普徧動。餘五亦然。合名十八相動。今普佛世界。而云六種者。舉總該別之義。若作表法釋者。地表無明。六動表住。行向地等妙。六位破斷。言衆生無明磅礴。如地相堅固。無始習氣。難爲動搖。今將聞斯法。圓破六位無明。故以地搖六動表之。雨華動地竟。

三大衆喜觀

爾時會中比丘比丘尼。優婆塞。優婆夷。天龍夜叉。乾闥婆。阿修羅。迦樓羅。緊那羅。摩睺羅伽。人非人。及諸小王。轉輪聖王。○是諸大衆。得未曾有。歡喜合掌。一心觀佛。

初通標會衆。比丘。卽憍陳如等。比丘尼。卽大愛道等。優婆塞夷。此云近事男女。謂久近三寶。承事供養。如此方男女。持齋奉戒之類。通敘不載者。譯者畧故。檀衆攝故。又此四衆。亦兼菩薩。以菩薩有在家出家。各以其類攝故。然則此中四衆。卽通序中三乘衆也。天卽天王天衆。龍卽龍王龍衆。夜叉。此

云暴惡。亦云勇健。亦云捷疾。謂其性暴惡。其力勇健。其行捷疾故。乾闥婆。卽俗樂神衆。阿修羅。卽非天神衆。迦樓羅。卽金翅鳥衆。緊那羅。卽法樂神衆。摩睺羅伽。此云大蟒神。什曰。是地龍而腹行也。通序中。無夜叉摩睺羅伽二部。仍科八部者。以此人攝四民。該四衆。不盡之機。非人攝餘趣。該八部。不盡之機。及諸小王者。卽阿闍世王等。十六國散粟王。是轉輪聖王。準阿含有四種。一金輪王。人壽八萬歲時出世。乘金輪寶。王四天下。統攝四洲。二銀輪王。人壽六萬歲時出世。乘銀輪寶。王三天下。不

攝北洲。三銅輪王。人壽四萬歲時出世。乘銅輪寶。
王二天下。不攝西北二洲。四鐵輪王。人壽二萬歲
時出世。乘鐵輪寶。王一天下。惟攝南洲。此四輪王。
增劫出世。各有輪寶。自然湧現。乘輪遊行。隨境化
導。故云轉輪聖王。準通序中。但云阿闍世王。今云
及諸小王。轉輪聖王。則前文之畧可知。問。輪王出
增劫。佛出
減劫。時既不同。焉入高會。答。此有二義。一謂此方
減劫。他方增劫。緣合時熟。乘輪至故。二謂如來說
法。延促同時。增劫
減劫。隨機各見故。○是諸下。總結喜觀大衆。卽如
上所標。四衆八部等。得未曾有者。有三義。一經未
有。無量義經。異常說故。二定未有。無量義定。異常

修故三境未有。雨華動地。異常見故。歡喜者。心懷踴躍。合掌者。身起恭敬。一心者。志念專注。觀佛者。瞪矇不瞬。皆是憤憤悱悱。可啟可發之狀。故向下如來眉際分輝之不容已也。顯相逗機竟。

二放光東照分二。一一光所照之境。二諸境所現之相。初

爾時佛放眉間白毫相光。照東方萬八千世界。靡不周徧。下至阿鼻地獄。上至阿迦尼吒天。

爾時。卽大衆喜觀時也。佛放光者。因有可啟可發之機。先施不言之教。以開發請之端故。眉間。卽兩

眉中間不偏不倚。表中道妙理法身德實相體也。白毫相者。三十二相之一。準觀佛三昧經云。佛初生時。牽長五尺。至成道時。牽長丈五。如琉璃筒。內外皎潔。表真空淨理。解脫德。實相相也。光從相出。故曰白毫相光。表妙有圓理。般若德。實相用也。照於東方者。東方爲群動之首。表此經爲諸經中上故。又東方就下。爲衆流之統歸。表今經純圓。爲教法之都會故。一界爲一佛化境。萬八千界。極言其分量廣也。靡無也。無不周徧。表一乘實相。統法界而無遺故。阿鼻。此云無間。亦云無遮。亦云無救。謂

受苦無間。無遮無救。故婆沙云。贍部之下。過五百
踰繕那。始有其獄。故名地獄。阿迦尼吒。此云質礙
究竟。卽色究竟天。蓋質礙卽色也。然此天在色界
最上。阿鼻在欲界最下。上至下至。中該人修鬼畜
表一乘實相。彌六道而無剩。故一光所照之境。竟
二諸境所現之相。三一衆生機感。二諸佛化應
三機盡化息。初

於此世界。盡見彼土。六趣衆生。

此界指本佛化境。彼土指萬八千土。佛光所照。遠
近不隔。故云於此盡見。六趣謂天人修羅地獄鬼

畜。由彼生而趣此死。而趣彼。故云趣也。衆生者。衆緣和合而受生故。此科卽感佛應世之由。與今佛未出世前衆生機感義同。方便品云。我以佛眼觀見六道衆生等。卽此義也。

二諸佛化應二 一從實施權二會權歸實 初

二 一從實二施權 初

又見彼土。現在諸佛。及聞諸佛。所說經法。

彼土。指萬八千土。諸佛。卽萬八千佛。由上六趣昇沉。熏動大悲。示成正覺。現坐道場。故云現在。亦於佛光中現。故又見也。及聞諸佛者。萬八千土。如在

目前。不惟見其形。又復聞其聲。故所說經法。卽諸佛。雖知根鈍。且稱本懷。演大華嚴。獨被上根。準後彌勒。偈云。演說經典。微妙第一。義屬華嚴無疑。此與今佛初成正覺。演大華嚴義同。方便品云。我始坐道場。觀樹亦經行。於三七日中。思惟如是事等。卽此義也。二施權并見彼諸比丘比丘尼。優婆塞優婆夷。諸修行得道者。

旣見從實。又見施權。故云并見。彼諸比丘等。卽轉照三會之機。論內證有三乘之別。論外貌惟四衆。

之表。故云諸比丘等。修行得道。兼因與果言之。論修行有諦緣六度之異。論得道有聞緣菩薩之殊。故云諸修行等。此與今佛三七日後。隨宜說法義同。但機顯教隱。講者多昧。方便品云。尋念過去佛所行方便力。我今所得道。亦應說三乘等。卽此義也。從實施權竟。二會權歸實。

復見諸菩薩摩訶薩。種種因緣。種種信解。種種相貌。行菩薩道。

見之再四。故云復也。諸菩薩指法華高會之機。旣經方等彈斥。般若淘汰。皆上上機。故云摩訶薩也。

因緣指所秉教理。以所秉教理爲生信發解之因緣故。云種種者。以教分六度。理別六宗。詳後彌勒偈中自知。忍可不疑曰信。由教而生了知不昧曰解。由理而生。故曰因教生信。緣理發解。但所秉教理不同。生信發解亦異。故云種種。如信布施者。自能解了財法無畏之義等。相貌者。指起行造修而言。蓋以信解存乎中。行修發於外。但以信解不同。行修亦異。故亦以種種言之。此與今佛四十年後會權歸實義同。亦由機顯教隱。講者多昧。方便品云。於諸菩薩中。正直捨方便。但說無上道等。卽此

義也

試觀萬八千土一切諸佛皆是從實施權。會權歸實。今佛當說法華。自可窺見一斑。向後

彌勒問云。爲欲說此。爲當授記。想由此而推度。所謂發起者。正在於是。諸佛化應竟

三機盡化息

復見諸佛般涅槃者。○復見諸佛般涅槃後。以佛舍利起七寶塔。

初二句。諸佛滅度。般涅槃。此云圓寂。謂應化已圓。歛身入寂。故亦云滅度。謂暫時息滅。度生事故。或云無真不圓。無妄不寂。故云圓寂。滅煩惱流。度生死海。故云滅度。此約斷證而言。非事論也。今以事論。不取常釋。此與今佛說法華已。轉雙林說涅槃。

入滅度義同。○後四句。滅後起塔。般涅槃後者。薪
盡火息。煙滅灰飛時也。以舍利起塔者。有二義。一
謂感佛恩德。供舍利如供聖容故。二謂顯佛遺化。
與人天作種福因故。舍利。具云舍利羅。亦云室利
羅。此翻靈骨。骨以靈稱者。是如來戒定熏成。現光
現相。誠求必應故。起猶造也。造塔必以七寶者。雖
爲顯敬。亦表法身真常。七財莊嚴之義。塔畧梵語。
具云塔波。此翻高顯處。處必高顯者。表佛德巍巍。
人天瞻仰之義。此與今佛滅度之後。分布舍利。起
塔供養義同。佛滅後事。詳見涅槃。避繁不錄。放光東照竟。

三會衆騰疑二 一彌勒疑念二大衆疑念 初
爾時彌勒菩薩作是念。今者世尊現神變相。以何因
緣而有此瑞。○今佛世尊入於三昧。是不可思議現
希有事。當以問誰。誰能答者。○復作此念。是文殊師
利法王之子。已曾親近供養過去無量諸佛。必應見
此希有之相。我今當問。

初推審因緣。作是念者。口不言而心自忖意。目前
之事。故曰今者。現神變相者。一光東照。神用莫測。
神也。諸佛化儀。變狀難思。變也。如此神變。豈徒現
哉。反復推審。必有因緣。故曰以何因緣。而有此瑞。

此瑞卽指光相。以命世罕覩。故稱爲瑞。○今佛下
思惟發問。光相因緣。惟佛能知。彌勒擬欲問佛。見
佛入定。不知何時方起。故曰。今者世尊入於三昧。
正以見決疑之無人也。擬欲自決。又以一光東照。
迥超言思。諸佛化儀。現非尋常。故曰。是不可思議。
現希有事。彌勒展轉思惟。必得事諳理明。因深智
勝。兼德足服人者。乃可發明此事。銷釋群疑。故曰。
當以問誰。誰能答者。○復作下。指人決疑。彌勒正
思惟時。覩見文殊。轉念決疑得人。故曰。復作此念。
是者指定之詞。文殊師利。正所指決疑人也。法王

子者不取十住。蓋以文殊影響輔化。爲諸佛慧命所係。名法王子。親近者。影響不離。供養者。理事雙修。是皆文殊多劫深因。故云已曾過去無量等極言其近供之廣。必應見此等。以值佛既廣。見識自多。故準後文殊領答文云。我於過去諸佛。曾見斯瑞。則文殊底蘊。今被彌勒已覷破矣。我今當問者。問意已決。蓋彌勒深知文殊能決根心之疑也。問。德文云。供養無量百千諸佛。未嘗獨指文殊。何故放光現瑞。彌勒不知。反推文殊爲供佛之多乎。答。彌勒不知。畧示二義。一約實行。二約權現。約實行者。初地不知二地。等覺不知妙覺。今放光現瑞。是如來自所證境。非彌勒補處智分。約權現者。彌勒權謀智鑒。知時知機。欲成簣鼓之儀。示同不知之

相。反推文殊亦二。一約表法。二約影嚮。約表法者。文殊表根本智。借彼發起。顯此經非智莫解故。約影嚮者。文殊乃久已成佛。彌勒以補處較之。雖供佛多。未免有稍遜意故。彌勒疑念竟

二大衆疑念

爾時比丘比丘尼。優婆塞。優婆夷。及諸天龍鬼神等。咸作此念。是佛光明神通之相。今當問誰。

爾時者。與彌勒疑念同時。非異時也。四衆義攝菩薩。天龍鬼神。義攝八部。等攝人及非人。小王輪王。蓋此中疑念之衆。卽前文喜觀之衆也。咸猶皆也。事非尋常。舉衆通疑。故云咸作此念。是佛光明句。正指所念之事。言神通相者。一光東照。廣狹無礙。

一化頓彰。延促同時。皆如來不可思議之神通也。
會衆疑同彌勒。復無方以求人。故但云今當問誰。
古德云。大疑大悟。小疑小悟。不疑不悟。前雖說經
入定。雨華動地。而法會大衆。但知歡喜合掌。一心
觀佛。是不疑也。今復動以光相。示以離言。乃得困
心衡慮。則啐啄之應。可希冀矣。會衆騰疑竟。

四問答發起二 一彌勒請問二文殊領答 初

二 一畧問二詳問 初二 一長行二偈頌

初

爾時彌勒菩薩欲自決疑。又觀四衆比丘比丘尼優

婆塞優婆夷及諸天龍鬼神等衆會之心。○而問文殊師利言。以何因緣而有此瑞神通之相。放大光明。照於東方。萬八千土。悉見彼佛。國界莊嚴。

初將問之狀。彌勒憂兒不泰。視定文殊。雖言未出口。而意已彰著。故云欲自決疑。此經家描寫之語也。又觀四衆等。是彌勒推已及人之意。意謂我以補處智分。尚不能知。况復餘衆。故用目而循歷之。是謂觀也。及諸天龍等。是用目由近及遠之意。意謂四衆久近世尊。尚不能知。况餘衆乍入高會。故依次而徧目之。是謂及也。疑存乎內。形現於外。觀

其外而知其內。故曰衆會之心。謂上所云觀者。觀衆會疑念之心也。○而問下。正問之語。必問文殊者。欲資大智。以決根心之疑故。此瑞卽指光相。相不徒施。故問何因緣有。一光東照。神化莫測。一代時化。變通無窮。故云神通相也。放大光明。舉能照之光。照於二句。舉所照之境。不言上至下至者。問之畧故。悉見二句。舉境所現相。國界莊嚴。義攝一化始終。以國界有佛說法。有衆修道。卽莊嚴故。

二偈頌

準諸經。偈頌有二。一祇夜。此云重頌。謂重頌長行故。二伽陀。此云孤起。謂孤然而起。

故。祇夜如向後重頌。伽陀如龍女偈讚。又天台於祇夜頌中。復開爲二。一起頌。謂長行在後。偈頌在

前。超越餘文而頌故。二追頌。謂長行在前。偈頌在後。追其已失而頌故。今於超頌追頌之外。復開爲四。一廣頌。謂長行中畧。偈頌中廣。二畧頌。謂長行中廣。偈頌中畧。三補頌。謂義順長行。而長行却無文相。應是長行未周。偈頌補出。揀非伽陀之偈。四義頌。謂廣畧等義。交雜難分。或義似長行。而文稍不類。講者若遇超頌追頌之處。須宜交叉指授。若遇廣頌畧頌之處。不必依長行分科。或開一爲多。或合多爲一。各隨文便俱得。至於補頌義頌。不必一一貼合長行。依文析義可也。今向下乃重頌長行。而爲文稍畧。屬畧頌攝。標頌云。

於是彌勒菩薩欲重宣此義。以偈問曰。

於是。謂於是時也。此義仍指長行。必欲重宣者。有四義。一隨國土。以天竺散華之後。多用貫華。如此方序後爲銘。二隨樂欲。以人情有樂散華。有樂貫

華。如此方樂文樂詩。三隨生解。以智性有解散華。
有解貫華。如此方解文解詩。四隨根器。以根器有
利有鈍。利者一聞卽解。鈍者再說方曉。今是頌更
有二義。一請求慇勤。二爲衆不倦。具此諸義。故欲
重宣。若向後佛說重頌。更有二義。一表慈誨諄切。
二爲衆集前後。非今偈義。偈者梵音之畧。具云偈
他。仍譌也。正云阿菟卒都波。此云讚頌。無論四言
乃至七言。四句乃至多句。皆可名之。今云偈問者。
是彌勒粲長行之義。作貫華以問也。此是標頌。
向正頌。
文殊師利導師何故眉間白毫大光普照。

首句稱名。示問有所屬也。導師者。佛之別稱。以能說法導衆。現相引迷。爲引導之師故。何故者。徵問之詞。頌上以何因緣等義。眉間二句。卽前能照之光。并所照之境。頌上放大光明。照於東方等義。不云所現之相者。偈從畧故。畧問竟。

二詳問。上以急於求決。故有畧問。此恐陳義不周。故又詳問。然此詳問一科。雖義順長行。而長行却無文相。蓋彌勒依前分四。一兼陳顯相後所見。詳悉補出。屬補頌攝。

二正陳放光三結見求決四防難申問

初疑念本爲

放光。但雨華動地等。又爲放光前相。故兼陳之。以見敘事有源。

雨曼陀羅。曼殊沙華。梅檀香風。悅可衆心。以是因緣。

地皆嚴淨。○而此世界六種震動。○時四部衆咸皆歡喜。身意快然。得未曾有。

初陳天人興供。四華舉二者。大小不分故。梅檀義翻與藥。香名也。以此香能除病故。今以風從華過。其氣如之。故云梅檀香風。陣陣襲來。淑氣宜人。故云悅可衆心。表開示悟入。法味普及之義。雨華敷地。不見塵土沙礫。香風撲鼻。不聞雜穢充滿。故云以是因緣。地皆嚴淨。表開示悟入後。心地清淨之義。○而此下陳地祇變相。可知。○後四句陳大衆喜觀部類也。出家二衆。在家二衆。其類有四故。不

言餘部者。舉親以攝疎也。咸皆歡喜者。歡雨華之有因。喜地動之非常。誠中形外。故云身意快然。未

曾見聞者。今獲見聞。故云得未曾有。

問。雨華動地之前。更有說

經入定二相。何不俱陳。答。無量義經。正被菩薩彌勒無所疑故。經既不疑。定自了了。故并不陳。

二正陳放光二 一一光所照之境二諸境所現

之相 初

眉間光明。照於東方。萬八千土。皆如金色。從阿鼻獄上至有頂。

眉間句。卽前能照之光。照於等。卽前所照之境。萬八千土。約一光橫照而論。皆如金色者。佛光所映。

表一切法界。咸同佛界故。從阿下。約一光豎照而論。有卽質礙頂卽究竟。約義畧言。從偈便也。一光所照之境竟。

二諸境所現之相三 一衆生機感二諸佛化應三機盡化息 初

諸世界中。六道衆生。生死所趣。善惡業緣。受報好醜。於此悉見。

首句。重舉前境。道猶路也。三善三惡。往返遊行。其道有六。故云六道衆生。趣猶向也。生而向此。死而向彼。故云生死所趣。善業惡業。各有多種。束之惟

十。謂身三口四意三也。持之則善。犯之則惡。各能牽連生死。故名業緣。緣卽牽連義也。善報惡報。亦有多種。束之惟六。如上品善因。報在天上。中品善因。報在人間。下品善因。報在修羅。皆名好報。上品惡因。報在地獄。中品惡因。報在餓鬼。下品惡因。報在畜生。皆名醜報。若微細分之。因果實繁。如一品因中。更開爲三。則善惡各有九品。以致天有勝劣。人有貴賤。一道之中。品類不齊。所謂衆生境界。不可思議。業報不可思議。今以隨因感果。如影隨形。故云善惡業緣。受報好醜。如上所說。一目無遺。故

云於此悉見前云。於此世界盡見彼土六趣衆生。此則較前稍加詳耳。衆生機感竟。

二諸佛化應二 一從實施權二會權歸實 初

二 一從實二施權 初

又觀諸佛聖主師子。演說經典微妙第一。其聲清淨。出柔軟音。教諸菩薩無數億萬。

觀亦見也。萬八千土各有世尊成道。故云諸佛。旣成道已。超諸聖而獨尊。故曰聖主。威光赫奕。驚魔外以潛踪。故稱師子。演說經典。卽指初說華嚴。積行菩薩。腩腮鱗於龍門。上德聲聞。杜視聽於嘉會。

故曰微妙。如須彌落群峯之高。似杲日奪衆景之
耀。故曰第一。其聲卽說法之聲。清淨者。不濁不雜。
平和嘹亮。乃至聖福德之相也。出猶轉也。以聲惟
渾淪。不能詮法。轉爲曲折之音故。柔軟者。八音之
一。謂不急不暴。調柔和軟。因地柔和善順所致。七
處九會。被機無量。故云教諸菩薩。無數億萬。是皆
圓頓大根。始見佛身。卽入佛慧者也。前云。又見彼
土。現在諸佛。及聞諸佛。所說經法。但約能說所說。
此則長出其聲清淨四句。兼約能被所被也。

二施權二一一總陳二別陳 初

梵音深妙。令人樂聞。○各於世界。講說正法。種種因緣。以無量喻。照明佛法。開悟衆生。

首二句承上起下。梵音三十二相之一。兼前清淨柔軟二義。因中常軟語故。果感此相。圓頓大教。獨被圓頓大根。故稱深妙。此承上文稱性極談。不逗群機之義。令人樂聞者。屈抑本懷。隨他意語。此起下文隨宜說法。巧被群機之義。必承上以起下者。顯諸佛施權。非得已也。○各於下。正以總陳。各於揀非法性。世界揀非受用。以法性塵刹混融。莫定邊疆。受用賢聖自住。非關化境。今以隱勝現劣。各

據化土。故云各於世界。講說與演說不同。演者直指義。講者分析義。此乃從本起末。析一爲三。故云講說。正法。揀非偏邪。以華嚴大教難投。群機流於凡外。今說三乘。對治凡夫偏執。外道邪見。故以正法名之。三乘之法。皆以因緣爲宗。但淺深不同。有卽空卽假卽中之別。故云種種。以無量喻者。有一因緣。卽有一事跡。可喻。蓋爲直言不了者之所施設。照明佛法者。約教而論。以小機不契大教。使佛法不行。是不明也。今以因緣之炬。譬喻之燈。照了佛法。使得顯明。故開悟衆生者。約機而論。以大教

不逗小機。令衆生無益。是不悟也。今以因緣之方。譬喻之便。開示衆生。令得悟入。故據此照明開悟二句。則顯實之旨。已露大端。彌勒尚推不知。是謂具擇法眼。真箇不知也。此科前文所無。蓋譯者爲避重煩。留此互出耳。總陳竟。

二別陳

若人遭苦。厭老病死。爲說涅槃。盡諸苦際。○若人有福。曾供養佛。志求勝法。爲說緣覺。○若有佛子。修種種行。求無上慧。爲說淨道。

初說聲聞乘。若人遭苦者。聲聞根鈍。以苦諦爲初

門故聲聞之機多遭困苦以知苦而後斷集故諸苦之中老病死甚故獨厭之餘非不厭在所緩也厭之一字正聲聞得力處以遭苦者多厭苦者少既知厭苦自不終於苦矣又厭之一字亦二乘狹劣處謂由厭苦故速出三界不發大心不得成佛也爲說涅槃者欲令慕滅之意涅槃卽滅諦也此翻滅度滅見思惑度分段死故際邊際也諸苦邊際灰泯而極若盡苦而身智仍存猶是邊際未了今依小乘涅槃取灰斷果故云盡諸苦際文缺集道二諦者舉果以該因故○次四句說緣覺乘若

人有福者。緣覺根利。以集諦爲初門。故緣覺之機。多出福樂。以恣福易於起惑故。曾供養佛者。出有福之因也。勝法卽因緣之法。較前四諦爲勝故。志求二字。正緣覺得力處。以有福者多。求法者少。旣知志求。自不爲福所迷矣。爲說緣覺者。緣字從教。卽十二因緣。覺字從機。卽七十七智。謂佛說十二因緣。令依七十七智。覺真諦理也。○末四句說菩薩乘。菩薩具佛種性。當紹佛位。故以佛子稱之。躬行實踐曰修。依果立因曰行。畧明六度。廣有多門。故以種種言之。無上慧卽佛慧也。佛慧尊極。故稱

無上求之一字。正菩薩得力處。以修行者多求慧者少。既知求慧。自不滯有漏之因矣。爲說淨道者。示以佛果淨道。令彼成無漏因。不以有爲染心而修諸行故。前云并見彼諸比丘比丘尼。優婆塞優婆夷。諸修行得道者。今則機教雙陳。三乘各別言之。益知其爲轉照三會之事矣。從實施權竟。

二會權歸實二 一結前起後二正陳機宜 初文殊師利。我住於此。見聞若斯。○及千億事。如是衆多。今當畧說。

初結前見聞。我住於此者。不離耆闍崛山。見聞若

斯者指上所見所聞。謂仗佛光明。不離耆闍崛山。所見所聞。已若斯之多矣。○後三句起後畧說。言所見所聞。不但如上之多。更有未陳。故曰及千億事。事卽向下六度等事。以千計億者。極言其事之多。故如是者。通指已陳未陳之相。言已陳之相。已云多矣。況及未陳。故云衆多。多而且衆。盡說不能。有疑在懷。不說不得。故云今當畧說。又畧有二義。一唯畧教。以上從實施權。皆機教雙陳。今下會權歸實。存機畧教。故二兼畧機。以最後極談。攝機甚廣。況萬八千土。豈言所能述。若今下所陳。畧多存

少故。此科前文所無。乃彌勒敘置語也。

二正陳機宜分二 一總標種種因緣 二別陳信

解相貌 初

我見彼土恒沙菩薩。種種因緣而求佛道。

首句重舉前境。恒沙菩薩者。卽法華高會之機。恒卽恒河。亦云菟伽河。此翻天堂來。以此河自雪山頂。阿耨達池流出。狀其來處最高。故河中金沙混流。其細如麵。今以其沙對菩薩者。極言其數之多。故種種因緣如前。不言信解相貌者。義在別陳中。故末句結其所宗。言所秉因緣。雖有種種。而原其

本意惟在佛果。如千逕九達。咸會王城。故云而求佛道。

二別陳信解相貌二 一次第緩陳二不次急說
初六 一布施二持戒三忍辱四精進五禪定
六智慧 初三 一外施二內外施三內施 初
或有行施。金銀珊瑚。真珠摩尼。硨磲碼碯。金剛諸珍。
奴婢車乘。寶飾輦輿。歡喜布施。回向佛道。願得是乘。
三界第一。諸佛所歎。

或者不定之詞。言萬八千土。相貌多端。恍惚如見。
故云或有行施。金銀質產於鑛。愈鍊愈精。舉世通

用寶也。珊瑚石中之寶。從波斯國及師子國來。形似鹿角。色赤而潤。以此土多尚赤故。爲世所珍。真珠亦云珍珠。或出蛤蚌。或出蛇蟠。以類有勝劣。故價直不等。摩尼珠名也。此翻無垢。其體清淨故。亦云如意。欲求所須。焚香拜祝。隨意能雨故。善友入海。卽求此也。碑礫碼礫。俱出於石。故四字從石。碑礫潔白中最。碼礫雜色非一。似玉非玉。并爲世寶。金剛者。最堅最利。能壞於一切。一切無能壞故。古德云。梵語斫迦羅。此云金剛。帝釋所有之寶。力士所持之杵。薄福衆生。目不能見。據此知非此土所

有諸珍二字。總該一切珍奇。言無寶不施也。奴婢僕隸通稱。車乘輪轂總名。用此爲施者。備聽用以供乘遊也。寶飾輦輿者。珍寶爲飾。人夫而駕。故輦字從夫從車。似王乘。非常御也。歡喜布施者。作益我想。揀非迫不得已。如割身肉之類。回向佛道者。回此功德。以向佛道。所謂不求人天福報。小果權乘是也。是乘。卽指佛乘。願得者。依之發心。期於必得。所謂惟依最上乘。發菩提心是也。是乘乃最上一乘。得之則出世成佛。故云三界第一。是乘乃諸佛心要。得之乃命脉相通。故爲諸佛所歎。然此中

似惟財施。其實義攝三檀。如歡喜布施。求者不懼。則攝無畏施。願成佛道。自起化他之行。則攝法施。兼本財施。則三檀具矣。後倣此外施竟。

二內外施

車馬妻子屬外財。身肉手足屬內財。

或有菩薩。駟馬寶車。欄楯華蓋。軒飾布施。○復見菩薩。身肉手足。及妻子施。○求無上道。

初車馬布施。駟馬四馬也。寶車珍御也。珍寶所成。駕以四馬。故云駟馬寶車。欄楯前後檻也。華蓋車上覆也。軒謂左右廂也。雜彩爲飾。故云軒飾。布施者。到處布散。隨乞施與。借此因行。以成果德也。○

復見下身眷布施。身謂全身。肉手足三皆身分攝。妻與夫相爲表裏。子與父相爲作述。皆眷屬攝。施之一字。總通身眷。然人之所最重者。莫過身命。最愛者。莫過妻子。今菩薩爲道忘軀。外形骸如桎梏。求真厭假。觀妻妾如畫瓶。故并施之。○末句總結所爲。言菩薩所以內外俱捨者。總爲求無上道。準後提婆達多品。佛自述云。吾於多劫。常作國王。願求無上菩提。欲滿六波羅密。勤行布施。心無憒惜。象馬七珍。國城妻子。乃至身肉手足等。卽此類也。

三內施

又見菩薩頭目身體欣樂施與求佛智慧。

去目傷體。僅壞其形。其施稍易。斷頭殺身。兼絕其命。其施甚難。今乃歡欣好樂。施與乞者。正以所得者重。而所失者輕耳。準報恩經。大光明王喚乞頭婆羅門云。汝今遠來。從我乞頭。我以慈心。憐愍汝故。不逆汝意。令我來世得智慧頭。施與汝等。今云求佛智慧。卽彼意也。問。父母遺體。不可毀傷。曾子捨身體并施。得母陷於不孝之罪耶。答。事有變常。務有重輕。豈不聞殺身成仁。如比干剖腹之類。至今無有能議其非者。況求出世大道。又非世間忠孝可比。將見多生父母。獲益之無窮。十方賢聖。歡喜之不盡。又誰謂其不能全。身而責其爲不孝之罪乎。布施竟。

二持戒

文殊師利。我見諸王。往詣佛所。問無上道。便捨樂土。宮殿臣妾。剃除鬚髮。而被法服。

陳說旣繁。恐不經意。故重稱其名。以告之。萬八千土。多有王子行道。故云我見諸王。往詣佛所者。表往非餘。誠意晉見故。問無上道者。自念善法教民。無濟於世。別求出世之道。普度迷情。此卽攝有情戒也。便捨者。飄然不顧之義。率土之境。皆爲王之所樂。故稱樂土。帝居曰宮。有丹楹刻桷之制。君御曰殿。有鸛鵲鳳凰之稱。輔佐曰臣。有百爾臣工之

司嬪妃曰妾。有三千粉黛之姿。凡此皆最爲難捨。今云便捨者。由詣佛問道。自覺世樂非真。故飄然長往而不顧焉。如非重道輕榮。視天下如敝屣者。不能如此。此卽攝善法戒也。剃除鬚髮者。表出塵之風度。而被法服者。絕世諦之儀容。此卽攝律儀戒也。持戒竟。三忍辱。

或見菩薩。而作比丘。獨處閒靜。樂誦經典。

而作比丘者。棄俗爲道。剃髮染衣。外絕五欲。內淨五篇。此約持戒明忍。不接人事。曰獨處。遠離諠雜。曰閒靜。又獨處者。絕抗對故。閒靜者。入深禪故。此

約禪定明忍。朝斯夕斯曰樂誦。聖賢成法曰經典。蓋欲借彼成法。資生正慧。故朝斯夕斯而樂誦之。此約智慧明忍。必約三學以明忍者。欲斷其流。務絕其源之義。蓋以不能忍者。多緣三毒而起。如彼此相貪。以至凌辱交至。彼此相瞋。以至忘身及親。癡迷不了。以至結怨懷恨。今菩薩三學既備。三毒自息。不惟能忍彼辱。亦且無辱可忍。是不忍之忍。乃真忍也。忍辱竟。四精進

又見菩薩勇猛精進。入於深山。思惟佛道。

勇猛者。悍勞不怯。忍苦不辭之義。精進者。諸緣不

雜。一念直前之義。深山。謂窮壑邃谷。人烟曠絕。住則與木石居。行則與鹿豕遊。飯糗茹草。寂寞難堪。今云入者。必是情忘世務。心死溪山。所謂柳栗橫肩不顧人。直入千峰萬峰去。亦如剛被世人知處所。又移茅茨入深山之類。思惟佛道者。結其所爲。言菩薩所以入深山者。蓋以佛道幽深。非浮泛可階。借彼懸崖絕巘。入正觀以思惟耳。古人於心地發明之後。三二十年住山。長養聖胎。卽此意也。

五禪定

又見離欲。常處空閑。深修禪定。得五神通。○又見菩

薩安禪合掌。以千萬偈讚諸法王。

初從淺入深禪。欲謂五欲。卽色聲香味觸也。必離之者。以能爲禪定障故。空閑乃無欲之地。必常處者。以暫離欲境。不能動靜一如。借彼以堅其心故。此約初心淺修言也。深修者。有漸次工夫。謂漸次深入。以造其極故。禪半梵語。具云禪那。此翻靜慮。慮卽微細觀照。揀非任運分別。故以靜言。定者對治散亂。亦靜慮義。今并言者。華梵雙稱。義易了故。神通有六。一天眼。二天耳。三他心。四宿命。五神境。六漏盡。今言五通者。以大乘教中。惟佛許漏盡餘。

皆不許故。然此五通。雖由禪定而發。非靜極情忘者。亦不能得。今旣云得。卽深修之驗也。○後四句。從深入妙禪。安禪者。揀上離欲求禪。謂不思而得。不勉而中。所謂深禪是也。合掌等。揀上處閑求靜。謂不起滅定。現諸威儀。所謂妙禪是也。以千萬偈者。或稱因頌果。或讚功論德。比興不同。吟咏各異。故大經云。讚佛相好。當願衆生。成就佛身。證無相法。今云。讚諸法王。自寓回向衆生意也。又安禪屬定。偈讚屬慧。旣能安禪。偈讚必是定慧圓融。不惟不被癡定所縛。亦不爲狂慧所悞矣。禪定竟。

六智慧

復見菩薩。智深志固。能問諸佛。聞悉受持。○又見佛子。定慧具足。以無量喻。爲衆講法。欣樂說法。化諸菩薩。破魔兵衆。而擊法鼓。○又見菩薩。寂然晏默。天龍恭敬。不以爲喜。○又見菩薩。處林放光。濟地獄苦。令入佛道。

初明大喜慧。智深謂天資聰敏。不住淺解。志固謂歡喜進求。不退初心。由智深故。所以能問諸佛。古德所謂扣關擊節。善咨心要是也。由志固故。所以聞悉受持。古德所謂文義雙持。瓶瀉不遺是也。○

次八句。明大慈慧。外息諸緣。內起正觀。故云定慧具足。所謂惺惺不礙寂寂。寂寂不礙惺惺是也。以無二句。有爲機施權之義。以用也。無量喻者。或因明示暗。或舉淺況深。機宜無量。權巧譬喻亦無量。故爲衆者。爲彼人天聞緣等機。講法者。分析戒善諦緣等法。如謂言詞方便力。令一切歡喜是也。欣樂二句。有稱理顯實之義。稱理直談。本懷始暢。故云欣樂說法。緣合時熟。聞卽得道。故云化諸菩薩。破者摧滅義。魔半梵語。具云魔羅。此翻奪命。傷法身。奪慧命。故準髻珠喻中。有陰魔。惱魔。死魔等。故

以兵衆言之。鼓者催軍號令。法能策勵行人。義相似故。故以爲喻。而猶故也。承上起下之詞。言菩薩所以講權說實者。正爲破魔兵衆。故擊權實法鼓。催賢聖軍與共戰耳。○又見下。明大捨慧寂然者。不動義。卽返觀內照。晏默者。安靜義。卽觀智相應。觀智相應。故感天龍恭敬。如空生晏坐。帝釋散華之類。不以爲喜者。以觀智相應時。心境兩忘。忘心亦忘。忘忘亦忘。尚不知有法可取。而況非法恭敬。詎能動其心乎。所謂法尚應捨。何況非法是也。○末四句。明大悲慧。處林謂外絕境界。累安處林野。放

光謂心垢洗除。慧光發現。所謂淨極光通是也。又處林放光者。以我之靜。形彼地獄之苦。熏動大悲。放同體光也。獄苦本空。因衆生無法自濟。從畢竟無。成畢竟有。今蒙悲光救濟。如湯潑雪。似炬消暗。故云濟地獄苦。佛道本圓。因衆生無法自資。從畢竟有。成畢竟無。今蒙慧光照觸。如種遇潤。似木逢春。故云令入佛道。準華嚴地獄蒙光。頓超十地之階。卽此類也。次第緩陳竟。

二不次急說

前科乃初呈問端。預備精詳。故六度各依次第。而緩以陳之。今因萬八千

土事相多端。只見者裏布施。那裏持戒。者裏修慧。那裏坐禪等。滿目皆菩薩行道。故不暇於次第而

急以說之分六 一精進二持戒三忍辱四禪定五布

施六智慧 初

又見佛子。未嘗睡眠。經行林中。勤求佛道。

嘗猶曾也。睡眠者。四不定心之一。昧畧爲性。

昧揀在定

畧揀寤時

障觀爲業。遺教經云。勿以睡眠因緣。令一生

空過。今菩薩恐唐棄此生。故未嘗睡眠。古德所謂

晝三夜三。決志不移是也。經行者。現行雖伏。習氣

猶熾。復循環以遣之。如今般舟三昧是也。必於林

中者。遠塵絕累。易進道故。如斯精進。無別所爲。惟

期成佛。故云勤求佛道。二持戒

又見具戒威儀無缺淨如寶珠以求佛道。

具戒者具有二義。一者秉受義。謂三師七證。秉受戒法故。二者具足義。謂具足禁戒。篇聚無虧故。威儀者。律明三千。依之則有威可畏。有儀可尊。故無缺者。嚴謹防護。蜎飛無損。如草繫鶯珠之類。寶珠內外明徹。淨無瑕穢。而菩薩戒淨如之。古德云。幽溪未足比其清。飛雪無以方其素。故云淨如寶珠。末句結持戒意。可知。三忍辱。又見佛子。住忍辱力。增上慢人。惡罵捶打。皆悉能忍。以求佛道。

住者安住。謂處辱如無。內心能安故。力者。準阿含說有六種。謂小兒啼爲力。女人瞋爲力。國王憍爲力。羅漢進爲力。諸佛慈爲力。比丘忍爲力。釋義則有所長。以勝人曰力。今菩薩自住柔順三昧。調伏剛強衆生。無剛不調。無強不伏。故云力也。增上慢人。卽未得謂得。未證謂證之流。由彼上慢熏心。見有勝已者。心懷憎嫉。故惡罵而捶打之。皆悉能忍者。以菩薩深證實相平等。怨親一致。揀非勉強過捺者比也。以求佛道者。如不輕徧記忍謗。終至行滿成佛之類。四禪定

又見菩薩離諸戲笑。及癡眷屬親近智者。○一心除亂。攝念山林。億千萬歲以求佛道。

首四句。是初心工夫。諸戲笑者。不惟口談非法。卽身作肆態。意恣放情。皆是以能妨亂正業。故須離之。癡眷屬者。卽不識因果。不信罪福之子弟也。此又不惟妨亂正業。且爲戲笑之源。故并離之。智者事理博達。見地超卓。具勘驗龍蛇之睛。秉陶鑄聖賢之手。故須親近。以能爲禪定之資故。○後四句。是深修工夫。一心除亂者。謂雖離戲笑。猶有微細亂想。故須專一其心而屏除之。攝念山林者。謂雖

離癡屬猶有塵俗餘念。故須山間林下而攝持之。
億千萬歲等。謂雖近智者。佛道貴在自肯。故須億
千萬歲而誠求之。問。人生在世。歲不滿百。間或有
之。見者希矣。今云億千萬歲。以
求佛道。此或必無之事。光中妄現耶。抑或實有之
事。而我未造其境耶。答。此有二義。一者定力攝持。
經多劫如一時。如後文五十小劫。謂如半日。古德
所謂一念萬年。萬年一念者是也。二者他界人壽。
未必拘定百歲。如此方北俱盧洲。人壽則有千歲。
况萬八千土。豈百歲可局哉。汝所謂未造其境者。
信矣。若謂光中妄現。則萬八千土。諸佛
化儀。皆成虛妄。何以爲今經之發起哉。禪定竟。

五布施

或見菩薩。肴膳飲食。百種湯藥。施佛及僧。名衣上服。
價直千萬。或無價衣。施佛及僧。千萬億種。栴檀寶舍。

衆妙卧具。施佛及僧。清淨園林。花果茂盛。流泉浴池。施佛及僧。○如是等施。種種微妙。歡喜無厭。求無上道。

初別列衆施。有佳品。膳美饌。飲茶漿。食常食也。湯惟煎劑。藥兼丸散。對病而施。故有百種之多。施佛及僧者。資色身療病軀故。至貴之衣曰名。至尊之服曰上。如無盡意瓔珞之類。故云價直千萬。或無價衣者。應屬天衣。以人世所無。故無價也。施佛及僧者。嚴相好。順時令故。千萬億種者。揀非少數。梅檀寶舍者。揀非凡材。如給孤精舍之類。卧具者。坐

卧之具。準戒經作新卧具。應用二分純黑羊毛。三分白。四分龙爲制。今云衆妙。似不局此。蓋卽繒纊。裯褥。衆寶床榻之類。施佛及僧者。備安居。供坐卧。故清淨園林者。紅塵不到之處。如祇陀園林之類。華果茂盛者。有行樹羅網之致。流泉浴池者。有七珍八德之幽。施佛及僧者。備遊宴資浣濯故。○末四句。總結施意。如是等施者。總指上來四事園林。般般精奇。故曰種種微妙。全無憒惜。故曰歡喜無厭。不求餘果。故曰求無上道。布施竟。

六智慧

或有菩薩說寂滅法種種教詔無數衆生。○或見菩薩觀諸法性無有二相猶如虛空。○又見佛子心無所着以此妙慧求無上道。

初文字般若說者隨機敷演之義寂滅卽真諦理也真諦無相故以寂滅名之不云理而云法者旣落言詮卽屬法相故教詔卽訓誨也隨機差別故云種種衆生卽化機也依教受化故云無數此菩薩以文字般若起利他行敷演法性也。○或見下觀照般若觀者離言默會之義諸法卽俗諦相也俗諦差別故以諸法名之不云相而云性者旣入

觀境卽屬性分故。旣屬性分。惟一真體。故云無有
二相。二相尚無。諸法寧有。是則真體凝然。無形無
相。無邊無表。故云猶如虛空。此菩薩以觀照般若。
起自利行。融通法相也。○末四句。實相般若。心無
所着者。真俗并遣。言觀雙忘之義。妙慧卽平等大
慧。無上道卽一乘實相。言上二有言有觀。總非平
等大慧。皆屬麤浮。不名微妙。有真有俗。終乖一乘
實相。咸爲對待。豈稱無上。今旣言觀雙忘。真俗并
遣。故云以此妙慧求無上道。此菩薩以實相般若。
起絕待行。破一切着也。齊此以上。兩陳六度之機。

蓋是彌勒擴充前文種種信解種種相貌之義。今問。

經三周授記并未顯彰六度之機。今以此判屬法華。何所據乎。答有二可據。一據火宅喻後佛囑身子。畧明十種是機。不出六度。故於所被機宜門中。特地拈出。令知六度菩薩。乃當此經之機。二據三周受記之衆。如身子之智慧。迦葉之精進。離婆多之心不倒亂。須菩提之不與物諍等。皆是內祕菩薩之德。潛行六度之行。况夫妙嚴出家。宛同諸王詣佛。不輕弘經。允符比丘住忍。例而推之。足爲明證。何言并未顯彰六度之機耶。諸佛化應竟。

三機盡化息

準前文應有二義。一諸佛滅度。二分滅後起塔。今缺初義。而後義仍長。分

二 一供養舍利二起塔嚴國 初

文殊師利。又有菩薩。佛滅度後。供養舍利。

菩薩。卽生前受化之衆。滅後當荼毘已竟之時。貯

以寶瓶。嚴以香華等。皆名供養。受化感恩。想像聖容者。理合如是耳。

二起塔嚴國

又見佛子。造諸塔廟。無數恒沙。嚴飾國界。○寶塔高妙。五千由旬。縱廣正等。二千由旬。一一塔廟。各千幢幡。珠交露幔。寶鈴和鳴。諸天龍神。人及非人。香華伎樂。常以供養。文殊師利。諸佛子等。爲供舍利。嚴飾塔廟。國界自然。殊特妙好。如天樹王。其華開敷。

初畧明。昔喜見菩薩。受淨明德。佛遺囑。收取舍利。作八萬四千寶瓶。起八萬四千寶塔。據此。則造諸

塔廟者。不惟感恩。亦兼受囑也。恒沙計之。仍稱無數者。極言其塔之多故。寶塔星羅碁布。舍利月燦燈輝。望之起敬。見者生歡。故爲嚴飾國界。○寶塔下。詳明塔以寶成。非凡材也。高而云妙者。仰彌高不可及故。上下二十萬里。故云五千由旬。南北曰縱。東西曰廣。四維無異。曰正等。徑過計八萬里。故曰二千由旬。一一塔廟。各千幢幡者。四維刹杆。所懸幢幡。計一千數。如藥王品中。表刹莊嚴。垂諸幡蓋是也。露幔。卽層層滴水傘也。珠交者。珠網交結之所成故。露幔之角。以寶爲鈴。微風吹動。音嚮相

和。故云寶鈴和鳴。佛遺舍利以作佛事。天人龍神等資舍利以作福田。故以香華技樂等而供養之。供而云常者。顯佛德殊勝。雖滅度之後。猶感供不絕也。文殊下。恐疑嚴國之意。重稱其名以告之。佛子起塔。本非嚴飾國界。故云爲供舍利。嚴飾塔廟。塔廟旣成。疆土因茲生光。故云國界自然。殊特妙好。末二句。喻明妙好之義。天樹王者。大經云。三十三天。有樹名圓生。根深五十由旬。挺高五十由旬。枝布五十由旬。花香五十由旬。帝釋鍾愛。故稱爲王。其花開敷者。色香具足。天人共賞。喻塔起國界。

時。福田殊勝。幽顯俱利。所謂嚴飾及妙好者。正在是矣。正陳放光竟。

三結見求決

佛放一光。我及衆會。見此國界。種種殊妙。諸佛神力。智慧希有。○放一淨光。照無量國。我等見此。得未曾有。佛子。文殊。願決衆疑。

初結見嘆異。佛放句。結能照光。我及等。結所照境。種種句。結所現相。此結見也。從實施權。援衆生出火宅。是爲諸佛神力希有。會權歸實。攝三乘入佛慧。是爲諸佛智慧希有。蓋彌勒因見諸佛權實得。

宜而嘆異之。此嘆異也。○後六句。牒疑求決。放一

句。牒所疑光。照無句。牒所疑境。我等二句。牒所疑

相。此牒疑也。末二句。求決其義可知。結見求決竟。

四防難申問

古德於此立四重伏難。而天台承用。今雖畧順彼義。未能全同。故以防難

申問

分四

一防初難申初問二防次難申次問

三防三難申三問四防四難申四問

初

恐文殊承上難

云。汝云願決衆疑。衆若有疑。衆卽應問。衆旣不問。是不疑也。衆旣不疑。我何所決。故此防云。

四衆欣仰瞻仁及我世尊何故放斯光明。

彌勒意謂仁者若謂衆旣不問。是無所疑者。誤矣。

何則我觀四衆欣仰瞻仁及我欣者欣我問仰者

仰仁答。瞻仁者不見仁答。及我者急欲我問。正憂
疑不泰之相。此防難也。末二句。申問。蓋由不知爲
說法華。故問何故放光。後云。我見燈明佛。本光瑞
如此。以是知今佛。欲說法華經。正答此問。

二防次難申次問

恐又難云。世尊放光。是佛境界。宜共問佛。佛自見答。故此防云。

佛子時答。決疑令喜。何所饒益。演斯光明。

彌勒意謂。仁者若謂是佛境界。宜共問佛者。理誠
然矣。但時衆有疑在懷。憂兇不泰。待佛出定。不知
何時。願佛子及時而答。速決衆疑。以令衆喜。此防
難也。末二句。申問。蓋彌勒已知多饒利益。但不知

畢竟如何。故問何所饒益。演斯光明。後云。今相如本瑞。是諸佛方便。今佛放光明。助發實相義。正答此問。

三防三難申三問

恐又難云。欲決衆疑。宜共籌量。獨令我答。於理不可。故此防云。

佛坐道場。所得妙法。爲欲說此。爲當授記。

彌勒意謂。仁者若謂欲決衆疑。宜共籌量者。我亦知然。但我管窺佛天。蠡測智海。轉照之化功已極。曲成之方便已周。惟有佛坐道場。所得妙法。四十年來。未曾吐露。此防難也。末二句。申問。蓋彌勒已知會權歸實。授記成佛。但不知事屬一貫。故云。

爲欲說此。爲當授記。後云。諸人今當知。合掌一心待。佛當雨法雨。充足求道者。正答此問。

四防四難申四問

恐又難云。如汝所說。卽是決疑。足令衆喜。何煩我答。故此防云。

示諸佛土。衆寶嚴淨。及見諸佛。此非小緣。文殊當知。四衆龍神。瞻察仁者。爲說何等。

佛土寶嚴者。光所照處。轉染成淨故。前缺此義。此中互出。及見諸佛。義該說法度生。舉人以攝法。舉主以攝伴故。此非小緣者。推重其事。不敢擅決之意。彌勒意謂。仁者若謂如我所說。卽是決疑者。過矣。何則。我雖馳心下思。測度於說法授記之間。但

以示現依正等相。此非小緣。豈可以予比量之智而判決哉。此防難也。末四句申問。良以法會大眾有困心衡慮之急。而文殊菩薩如不見不聞之狀。故代衆而達情曰。文殊。應當了知。現前四衆龍神。各各瞻察仁者。幸勿過謙。以負衆望。今問仁者。究竟爲說何等。後云。諸求三乘人。若有疑悔者。佛當爲除斷。令盡無有餘。正答此問。以上連申四問。層次秩然。似虛似實。莫可定量。初云。世尊何故放斯光明。全似不知。次云。何所饒益。演斯光明。畧露鋒芒。又云。爲說妙法。爲當授記。分明合盤托出。至云。

瞻察仁者。爲說何等。却又殃及文殊。是皆彌勒智辯具足。予奪自在。故假若智若愚之狀。演出半吐半露之態。引進權小。仰求大智。所謂憐兒不覺醜也。彌勒請問竟。

二文殊領答二 一畧答二詳答 初二 一惟忖直答二引古作證 初

爾時文殊師利。語彌勒菩薩摩訶薩。及諸大士。善男子等。如我惟忖。今佛世尊。欲說大法。雨大法雨。吹大法螺。擊大法鼓。演大法義。

爾時卽彌勒請問之時。語謂覲面而告也。以彌勒

正爲請主。故文殊覲面而告語之。及者聲臨衆耳之義。大士者。菩薩之異名。以能具大道心。超世間士故。準敘分數有八萬。故云諸也。善男子等。呼菩薩等大衆。欲酌前請。以決法會之疑故。如我惟忖者。文殊自謂。如我所見。思惟忖度也。今佛世尊等。正所惟所忖之事。法而言大者。教大理大。行大果亦大故。此總標也。雨大法雨句。別明教大。雨者以潤澤爲義。取以喻教者。佛以一乘教法。潤入機心。令彼開佛知見。如天雨雨故。吹大法螺句。別明理大。螺者以號令爲義。取以喻理者。佛以一乘理法。

號令化機。與彼示佛知見。如軍吹螺故。擊大法鼓句。別明行大。鼓者以策勵爲義。取此喻行者。佛以一乘行法。策勵行人。令彼悟佛知見。如陣擊鼓故。演大法義句。別明果大。演義二字。古德直約法釋。今亦作喻言。演義者。如登場作戲之類。謂借彼假相。演出真義。以動人心。故取此喻果者。佛以示成果德。演出一乘果法。竦動機心。令彼入佛知見。如登場演義故。由具上來四種大義。故總以欲說大法標之。此文殊欲酌衆請。如已所見而惟忖之也。惟忖直答竟。二引古作證。

諸善男子。我於過去諸佛。曾見此瑞。放斯光已。卽說
大法。○是故當知。今佛現光。亦復如是。○欲令衆生。
咸得聞知。一切世間難信之法。故現斯瑞。

初引古曾見。過去曾見此瑞者。顯惟忖有本。非臆
見也。放已卽說大法者。顯答問有據。非妄談也。○
是故下。證今亦如。言佛佛道同。古佛旣爾。今佛亦
然故。○欲令下。結答前問。欲令二字。出成放光本
意。衆生者。總該三乘五性。以一切衆生。莫不有心。
凡有心者。皆當作佛。故欲咸得聞知。揀非從前有
遮限也。一切世間者。總該九界。謂此經淺而論之。

已非凡小可及。深而究之。雖至等覺猶惑。故總云
難信。如卽權顯實。而千二騰疑。卽迹顯本。而彌勒
致辯。蓋可見矣。準前彌勒問云。以何因緣而有此
瑞。今云欲令衆生咸得聞知等。故現斯瑞。正應前
來畧問之義。而結答之。必至此而結答者。惟付引
證。乃足取信。故畧答竟。

二詳答

前以迷悶事急。故有畧答。應前畧問之義。此恐陳義未周。故又詳答。應前詳問之義。

分二

一長行二偈頌

初四

一總引燈明二

別明往事三結會古今四應問結答

初二一

詳引最初一佛二畧引相繼二萬

初二一總

標化儀二別明三善 初

諸善男子。如過去無量無邊不可思議阿僧祇劫。爾時有佛。號日月燈明。如來。應供。正徧知。明行足。善逝。世間解。無上士。調御丈夫。天人師。佛。世尊。演說正法。初善。中善。後善。

如者。指實之詞。謂指彼過去燈明事迹。以實前文過去曾見之語。阿僧祇。此云無數。劫。半梵語。具云劫波。此翻時分。時稱無數。已云久矣。而又云不可思議等者。極顯此法。名標劫外。體居象先。所謂有物先天地也。日月燈明。佛之別號。古德云。日以光

明照晝月以清涼照夜燈續日月之所不及。如來三智圓明。破世愚暗如之。故以爲號。如來應供等佛之通號。如來者。佛佛道同。後佛出世。如先佛再來。名倣同先德號。應供者。智斷具足。應受供養。名堪爲福田號。正徧知者。永離外道邪知。凡小徧知名。揀邪異徧號。明行足者。明足慧滿。行足福圓。名福慧雙隆號。善逝者。逝往也。生死不離而離。涅槃不往而往。名妙往菩提號。世間解者。解了世間性相真僞。名達僞通真號。無上士調御丈夫者。證無上道。超世間士。名無上士。具丈夫力。調御群品。名

調御丈夫。合名悲智究竟號。天人師者。應機說法。善導天人。名模範三界號。佛者。自覺覺他。覺行圓滿。名三覺圓備號。世尊者。具上九德。世出世間之所尊重。名九界同尊號。此十號者。諸佛同具。自古解釋不同。今刪繁就簡。畧難取易。雖稍異古註。而會理無殊。演說正法者。如來出世。開示出世正道。非世邪法故。有益於人曰善。初善。卽先照時也。以先照時中。同教一乘人等。獲轉同成別益故。中善。卽轉照時也。以轉照時中。小乘人等。獲轉小成。大益故。後善。卽還照時也。以還照時中。偏教五乘人。

等。獲轉偏成圓益故。總標化儀竟。

二別明三善

其義深遠。其語巧妙。純一無雜。具足清白梵行之相。
○爲求聲聞者。說應四諦法。度生老病死。究竟涅槃。
爲求辟支佛者。說應十二因緣法。爲諸菩薩。說應六
波羅密。○令得阿耨多羅三藐三菩提。成一切種智。
初別明初善。其義深遠句。約理而言。理不自理。必
借義以析之。故云其義。稱性直指。群機絕分。故云
深遠。其語巧妙句。約教而言。教不自教。必借語以
宣之。故云其語。多方敷演。俱會玄宗。故云巧妙。古

德云。既屬華嚴。不合其語巧妙。不知巧而云妙。已
寓揀別意。故純一無雜句。約果而言。惟顯佛果。故
云純一。不涉餘乘。故云無雜。具足清白等。約行而
言。一攝一切。故云具足。從性起修。故曰清白。不惟
離於五欲。兼順性法。愛亦離。故曰梵行。以梵翻離
欲。故也。○爲求下。別明中善。聲聞根鈍。不堪承受
大法。故以四諦法說而應之。生老病死。苦諦也。度
兼集諦。以度苦。必斷集。故度猶脫也。涅槃滅諦也。
究竟義兼道諦。以證滅。必修道。故究竟猶證入也。
辟支。具云辟支迦羅。此翻緣覺。緣覺根利。能知諸

法因緣。故以十二因緣法說而應之。十二因緣者。謂無明緣行。屬過去二支因。行緣識。識緣名色。名色緣六入。六入緣觸。觸緣受。屬現在五支果。受緣愛。愛緣取。取緣有。屬現在三支因。有緣生。生緣老死等。屬未來二支果。詳於化城品釋。菩薩大根。具上求下化之心。欲到彼岸。故以六波羅密說而應之。波羅密。此云到彼岸。謂依此六度法修。能到涅槃彼岸故。○令得下。別明後善。會三歸一。普記成佛。故云令得阿耨等。能知一切諸佛道法。能知一切衆生因種。名一切種智。蓋上句令其得果。此句

令其成智也。詳引最初一佛竟。

二畧引相繼二萬

次復有佛。亦名日月燈明。次復有佛。亦名日月燈明。如是二萬佛。皆同一字。號日月燈明。○又同一姓。姓頗羅墮。○彌勒當知。初佛後佛。皆同一字。名日月燈明。十號具足。所可說法。初中後善。

初次第標名。○又同下。兼出姓氏。頗羅墮。此云利根。亦云捷疾。以六根聰利。緣境捷疾爲姓也。○彌勒下。結告顯同。二萬佛同名同姓。事出罕希。難於取信。故呼名而結告之。字名號。皆稱謂也。通別名。

號俱同者。實德既同。稱謂亦同故。所可說法。卽是正法。如稍涉邪偽。則非佛可說故。初中後善。化儀同也。據此。則二萬燈明。與光中萬八千佛。三時設化。如出一轍。豈至今佛而獨不然。故文殊引此爲例。欲彌勒深思而自得之。總引燈明竟。

二別明往事

所見往事。全在此科。故別明之。

分五

一時至機熟

二顯相逗機。三放光東照。四會衆騰疑。五說法授

記

初二

一畧舉時機。二義顯至熟

初當時之機

不獨王子。但舉王子爲例。故云畧也。

其最後佛。未出家時。有八王子。一名有意。一名善意。

三名無量意。四名寶意。五名增意。六名除疑意。七名嚮意。八名法意。

其最後佛者。文殊自指本師。未出家時者。在俗爲輪王時也。有八王子者。應是多劫久證。示生佛家。如今佛羅云之類。有經有權。能常能變。名爲有意。善法治世。善政教民。名爲善意。經畫謀畧。難可測量。名爲無量意。善爲至寶。不令有失。名爲寶意。惡意日損。善意日增。名爲增意。事理博達。能除衆疑。名除疑意。善應物情。如嚮應聲。名爲嚮意。法度紀綱。皆悉明備。名爲法意。此以八子皆爲輪王。故將名

就位而畧釋之。若作表法者。佛表真如。未出家時。表真如在纏。八王子。表轉變八識。有意。表賴耶。受熏持種。有諸法故。去後來先。爲中有故。善意。表末那。善成六轉。爲染淨依故。無量意。表六識。剎那生滅。絕分量故。寶意。表身識。一切衆生。共寶愛故。增意。表舌識。着味增惡。說法增善故。除疑意。表鼻識。合中便知。無所疑故。嚮意。表耳識。能聽音嚮故。法意。表眼識。觀察諸法相故。據此。則妙光師燈明師。本心也。燈明傳妙光。傳本智也。八子師妙光。依本智而契本心也。妙光化八子。依本心而化本識也。

例而推之。則燈明一代化儀。不出吾之一心。若了
自心。則今佛光瑞之旨。可立見矣。畧舉時機竟。

二義顯至熟。

時至機熟。又無明言。但云出家發
意修梵行。爲法師等。蓋約義顯耳。

是八王子。威德自在。各領四天下。○是諸王子。聞父
出家。得阿耨多羅三藐三菩提。悉捨王位。亦隨出家。
發大乘意。常修梵行。皆爲法師。○已於千萬佛所。植
諸善本。

初明在俗勢位。威德者。位統四洲。有威可畏。教施
十善。有德可仰。故自在者。寬猛相濟。權不在人。所
謂禮樂征伐。自天子出也。各領四天者。是金輪王。

揀餘輪故。○是諸下。明出家因果。聞父出家。驗知王位無益。聞父得道。驗知出家有功。驗知王位無益。故悉捨之。驗知出家有功。故亦隨之。古人所謂是父是子者。僅見之矣。發大乘意者。起上求下化之心。建自利利他之行。如三心四願等。是大乘之心。永無退轉。故云常修入理之行。清淨潔白。故稱梵行。所謂戴鐵輪而不退。用繁興以恒如也。法師者。弘法自任。爲人天師。非時至機熟者。曷克臻此。科云義顯者。良有以焉。○已於下。明往昔深本。言法師之位。不易可階。王子一生便至。其故何也。皆

由已於千萬佛所植諸善本。所謂根深枝茂者。其信然矣。問。準教中。輪王出增劫。佛出減劫。何故燈明成佛時。八子皆爲輪王耶。答。法有權實。事有變常。以變常論之。或燈明願在增劫。或增劫衆生機熟。乃應世之變。非常事也。以權實論之。佛出減劫。或權宗固執之語。大乘真實之談。不拘乎此。如向後燈明說經。六十小劫。而大衆謂如食頃。豈可以增劫減劫而難問之。知此權實變常之義。則古德八子一子之難。大乘小乘之執。可并通矣。時至機熟竟。

二顯相逗機分三 一說經入定二雨華動地三

大衆喜觀 初

是時日月燈明佛說大乘經。名無量義。教菩薩法。佛所護念。說是經已。卽於大衆中結跏趺坐。入於無量

法華指掌疏
義處三昧。身心不動。

二雨華動地

是時天雨曼陀羅華。摩訶曼陀羅華。曼殊沙華。摩訶曼殊沙華。而散佛上。及諸大衆。普佛世界。六種震動。

三大衆喜觀

爾時會中比丘比丘尼。優婆塞。優婆夷。天龍夜叉。乾闥婆。阿修羅。迦樓羅。緊那羅。摩睺羅伽。人非人。及諸小王。轉輪聖王等。是諸大衆。得未曾有。歡喜合掌。一心觀佛。

此上三科。與今佛顯相。文義全同。無煩瑣釋。顯相

逗機竟。

三放光東照

爾時如來放眉間白毫相光照東方萬八千佛土。靡不周徧。如今所見。是諸佛土。

所照境中。闕上至下至之文。末二句所現之相。如今所見者。文殊不欲瑣敘。令準今而知昔故。是諸佛土。應指佛土中所現之相。放光東照竟。

四會衆騰疑

彌勒當知。爾時會中有二十億菩薩。樂欲聽法。是諸菩薩。見此光明。普照佛土。得未曾有。欲知此光所爲。

因緣。

教以當知者。令知今昔皆同。勿以不知自怪也。二十億菩薩。卽當時騰疑之衆。不言四衆八部者。菩薩尚疑。餘可知故。今佛騰疑文中。無多菩薩者。四衆攝也。樂欲聽法者。據前歡喜合掌。一心觀佛。卽傾渴翹佇。願聞法要之相。得未曾有者。先意本爲聽法。偶見佛光普照。如得未曾有見之物。且喜且疑。有不能釋於心也。欲知因緣。亦反復推審之義。由是觀之。今昔皆同。惟虛心待之可矣。準現會騰疑之後。更有問答發起一科。今不敘者。亦鈍置彌勒之意。如宗家所謂且疑着是也。會衆騰疑竟。

五說法授記二 一出定說法二唱滅授記 初
時有菩薩名曰妙光。有八百弟子。○是時日月燈明
佛從三昧起。因妙光菩薩說大乘經。名妙法蓮華。教
菩薩法。佛所護念。○六十小劫不起於座。時會聽者
亦坐一處。六十小劫身心不動。聽佛所說。謂如食頃。
是時衆中無有一人。若身若心而生懈倦。

初明所被之機。大成云。聖人無名。因德以彰。神通
莫測。曰妙。朗照群昏。曰光。愚謂妙表智體。光表智
用。體絕思議。用徹權實。故以妙光稱之。學在師後。
曰弟。智從師生。曰子。特標八百弟子者。一顯妙光

智深歸從者衆。一顯法華高會。聽衆有人。所謂機感盈前是也。大成云。昔佛八子師妙光。佛出定爲妙光說經。今佛羅云。師身子。下出定爲身子說經。是因人同也。或曰。妙光是菩薩。身子是聲聞。云何同耶。大成釋云。比及發迹。身子亦是菩薩。妙光垂迹。未必不是聲聞。文殊巧說。方便隱顯耳。○是時下。明能被之教。起者對滅而言。入時名滅。滅諸緣故。出時名起。起言象故。今欲說法華。故從三昧起也。因者。顯非獨爲。但因之以開其端耳。必因妙光者。顯法華非智莫解。今因身子亦然。準前云。欲說

大法。又云難信之法。終未顯彰本經名目。蓋恐難於取信。今假燈明事迹。無心唱出。不欲人信。而自無不信。則文殊可謂善於辭說者矣。淺識聞之。迷惑不解。故云教菩薩法。久默斯要。不務速說。故云佛所護念。○六十下。明會遇時節。準教中人壽十歲時。子年倍父年。增至八萬四千歲。然後百年減一歲。減至十歲。如是一增一減。爲一小劫。今云六十小劫。其時可謂長矣。雖經時長。而說無異座。故云不起於座。時會聽者。而聞無異席。故云亦坐一處。形與道合。智與理冥。故云身心不動。延促同時。

念劫無礙。故云謂如食頃。大成云。今經五十小劫。謂如半日。是時同也。無一人懈倦者。顯箇箇精誠。無若身若心之一有懈倦者。顯內外精誠。然此亦是因深緣勝。教到機熟之所致耳。出定說法竟。

二唱滅授記二 一對衆唱滅二授記潛輝 初

日月燈明佛。於六十小劫。說是經已。○卽於梵魔沙門婆羅門。及天人阿修羅衆中。而宣此言。如來於今日中夜。當入無餘涅槃。

初結前○卽於下。正明說法唱滅事。屬一會。故云卽於。今經寶塔品後唱滅。與此同也。梵謂梵天。色

界主也。魔謂魔天。欲界主也。沙門翻勤息。攝出家衆。婆羅門翻淨行。攝在家衆。天人修羅。八部舉三。餘以衆字該之。此言卽唱滅之語。必衆中宣者有二義。一生善。二滅惡。生善者。由佛久住。薄德之人。不種善根。一聞唱滅。戀慕渴仰。種善根故。滅惡者。由佛不滅。懈怠衆生。便起憍厭。一聞唱滅。生難遭想。憍厭自息。故涅槃義見前文。無餘有二。一者斷見思惑。分段永寂。名小乘無餘。二者五住究盡。二死永亡。名大乘無餘。今佛所入。是大非小也。言當入者。出世事畢。化道已周。縱住於世。無所益故。必

於中夜者。表身歸中道。性入常寂之義。

問。今佛唱滅文云。如

來不久。當入涅槃。尚待異時。今云今日中夜。法華涅槃。相去何太促乎。豈彼佛未說涅槃。而取滅度耶。答。此有二義。一約法廣畧不定。二約時延促不定。約法廣畧不定者。同是一法。或廣說無盡。或一言畧周。約時延促不定者。同在一時。或延為多劫。或促歸一念。總以佛力自在。神用難思。因機差別。隨心現量。豈可以常情而難問哉。

對衆唱滅竟。

二授記潛輝

時有菩薩名曰德藏。日月燈明佛。卽授其記。告諸比丘。是德藏菩薩。次當作佛。號曰淨身。多陀阿伽度。阿羅訶。三藐三佛。○佛授記已。便於中夜。入無餘涅槃。

初授記補處。菩薩名德藏者。準大成有二義。一含藏義。謂恒沙功德悉皆具足故。二出生義。謂以此功德徧施衆生故。一約自證。二約化他言也。聖言說與曰授。憶念取證曰記。時有德藏。卽授其記者。有三義。一入滅時近故。二道統事急故。三人不可失故。告諸比丘者有二義。一令作證明故。二令知依止故。次當作佛者。非同法華遠記。乃記以次補佛處。與今佛記彌勒事同。要知法華非無遠記。蓋文殊不欲盡言。恐成解路障。後悟門耳。因備衆德。果感相嚴。故別號淨身。多陀阿伽度。此云如來。阿

羅訶。此云應供。三藐三佛。此云正徧知。十種通號。舉前以攝後故。○佛授下記已潛輝。授記已使入滅者。大成云。斯道有賴故。本懷已暢故。化緣已畢故。自此以上。約大科共有五段。係燈明一。代化儀。今佛四十年前。多方淘汰。時至機熟。是過去事。與燈明同也。經初顯相逗機。放光東照。會衆騰疑。是現前事。與燈明同也。至於說法授記。猶屬後事。雖未見其同。可以預知。前云欲說大法等。本於此矣。別明往事竟。

三結會古今二 一師弟本因二結會釋疑 初

二 一文殊本因二彌勒本因 初

佛滅度後。妙光菩薩持妙法蓮華經。滿八十小劫。爲人演說。○日月燈明佛八子。皆師妙光。妙光教化。令其堅固。阿耨多羅三藐三菩提。○是諸王子。供養無量百千萬億佛。已皆成佛道。其最後成佛者。名曰然燈。

初妙光弘經。滅後持經者。奉是道以修身自行也。滿劫演說者。運是道以利衆化他也。○日月下八子受化。燈明八子皆師妙光者。以妙光二利具足。堪爲師承故。大成云。不以父爲師。以妙光爲師者。

易子而教之意。今羅云師身子亦然。妙光教化者。教以實道。化其權心。故權心既化。實志自堅。故云堅固菩提。堅不自堅。功歸妙光。故云令其堅固。○是諸下。極顯因深。王子供佛。行滿也。皆成佛道。果圓也。弟子行滿果圓。師可知矣。是皆文殊恐類自伐。故假王子。以顯自己深本。最後成佛。卽第八子也。名曰然燈者。準大論初生之時。身光如燈。以至成佛。故以名焉。是釋迦第二僧祇授記本師。據此則釋迦師然燈。然燈繼七兄。展轉逆推。歷九世而之妙光。則文殊深本。豈可思議者哉。文殊本因竟。

二彌勒本因

八百弟子中有一人號曰求名。貪着利養。雖復讀誦衆經。而不利。多所忘失。故號求名。○是人亦以種諸善根。因緣故。得值無量百千萬億諸佛。供養恭敬。尊重讚歎。

初抑其名利役心。前云妙光有八百弟子。此云八百弟子中有一人。則一人亦妙光之弟子也。名與利相因。既號求名。則心爲利役可知。貪着等。出命名之由。利養爲役心之本。既曰貪着。必是好遊族姓。忘實務名之人。如是之人。不暇讀誦。雖復勉強。

讀誦其心思智慮盡爲名利所耗。故曰而不通利。通謂達其義利。謂熟其文也。多所忘失者。不通則義非已有。多至昏忘。不利則文非心持。多至廢失。是則文義全無實得。讀誦惟慕虛名。故以故號求名結之。○是人下揚其種善值佛。種善者。所貪利養。不私於己。多於佛法僧中。作利益事故。由此因緣。故得值佛。無量百千等。極言其值佛之多。供養恭敬等。極顯其無空過者。初云亦者。例上八子而言。言不惟八子行滿果圓。雖如是求名之人。亦以種善因緣。值無量佛。由此觀之。則今之學道者。苟

未能輟利養。絕貪求。亦當於佛法僧中。作利益事。
爲當來值佛之因耳。師弟本因竟。

二結會釋疑

彌勒當知。爾時妙光菩薩。豈異人乎。我身是也。求名
菩薩。汝身是也。

本地旣彰。理合自醒。彌勒故昧宿因。故教以當知。
昔之妙光。卽今之文殊。故曰豈異人乎。我身是也。
昔之求名。卽今之彌勒。故曰求名菩薩。汝身是也。
科云釋疑者。恐疑彌勒文殊同居學地。知與不知。
彼此應同。何故彌勒問而文殊答耶。故結會以釋。

之言迹雖同居學地。本實各有淺深。一弟一師。故應問應答。結會古今竟。

四應問結答

今見此瑞。與本無異。是故惟忖。今日如來。當說大乘經。名妙法蓮華。教菩薩法。佛所護念。

此瑞指今佛光相。與本燈明。若合符節。故云無異。是故惟忖。應前如我惟忖。言前云如我惟忖等者。蓋以是今昔不異之故耳。當說大乘等者。光瑞既同。說法亦應同故。準前彌勒問云。四衆龍神。瞻察仁者。爲說何等。今云當說大乘等。正應問而結答。

之也。長行竟。

二偈頌

標頌云

爾時文殊師利於大眾中欲重宣此義而說偈言。正頌

分四 一頌總引燈明二頌別明往事三頌結會

古今四頌應問結答

初上長行分二。一詳引最
初一佛二畧引相繼二

萬。今偈頌不分。且爲
文畧畧屬畧頌也。

我念過去世無量無數劫。有佛人中尊。號日月燈明。
世尊演說法。度無量衆生。無數億菩薩。令入佛智慧。
念謂憶念。過去遠指往昔。長行云。無量無邊不可
思議阿僧祇劫。此云無量無數者。舉始末以攝中。

隨偈便故。佛之一字。總指二萬燈明。然佛雖九界通尊。而現相人中。故稱人中尊也。號日月燈明者。舉別號。攝通號故。世尊演說法者。準長行卽是正法。亦是初中後善。初善獨被大根。中善廣被三乘。故云度無量衆生。及無數億菩薩。後善會三歸一。普記成佛。故云令入佛智慧。頌總引燈明竟。

二頌別明往事五 一頌時至機熟二頌顯相逗機三頌放光東照四頌會衆騰疑五頌說法授記

初畧頌

佛未出家時。所生八王子。見大聖出家。亦隨修梵行。

首二句。頌畧舉時機。佛指最後佛也。八王子。舉數畧名。下二句。頌義顯至熟。大聖出家。畧得菩提。隨修梵行。畧發意爲師。及植善等義。

二頌顯相逗機

長行分三。今畧大衆喜觀。惟存前二。仍與長行不類。屬義頌也。

時佛說大乘經名無量義。於諸大衆中。而爲廣分別。佛說此經已。卽於法座上。跏趺坐三昧。名無量義處。○天雨曼陀華。天鼓自然鳴。諸天龍鬼神。供養人中尊。一切諸佛土。卽時大震動。

初頌說經入定。無量義經。雖明爲菩薩。而暗爲聲聞。故云衆中分別。餘同長行。○後六句。頌雨華動。

地。四華舉一。長出天鼓自鳴。大成云。此鼓在妙法堂上。諸天娛樂時。其鼓自鳴。演說苦空無常不淨等法。今表出定之後。無問自說。故自鳴也。諸天二句。明雨華鳴鼓所以。蓋爲供養人中尊也。一切佛土。準今佛顯相文中。卽指一佛化境。非十方佛土也。頌顯相逗機竟。

三頌放光東照分二。一一光所照之境。二諸境所現之相。初

佛放眉間光。現諸希有事。此光照東方。萬八千佛土。諸希有事。預指下科諸相。蓋是文殊信口帶言。非

此科正意。

二諸境所現之相

長行但云如今所見。是諸佛土。今詳細頌出。屬廣頌。於中

分二 一衆生機感二諸佛化應 初

示一切衆生生死業報處。

示現也。處之一字。總通上文。謂生死處。造業處。受報處也。準彌勒偈中。六道衆生。卽此中初句。生死所趣。善惡業緣。受報好醜。如次卽此中三處。是今昔所現機感同也。

二諸佛化應分二 一從實施權二會權歸實

初二 一從實二施權 初

有見諸佛土。以衆寶莊嚴。琉璃玻瓈色。斯由佛光照。及見諸天人。龍神夜叉衆。乾闥緊那羅。各供養其佛。○又見諸如來。自然成佛道。身色如金山。端嚴甚微妙。如淨琉璃中。內現真金像。世尊在大衆。敷演深法義。

初成道前相。土以寶嚴。受用土也。琉璃。具云吠琉璃。此云青色寶。玻瓈。此云水玉。惟此二色。映蔽衆寶。故偏言之。轉染成淨。力資佛光。故云斯由佛光照也。此是諸佛垂得菩提。勝依先現之相。及見諸天人等。八部舉五。以攝餘故。各供養其佛者。或敷

座雨華。或擊鼓奏樂等。此是諸佛垂得菩提。預興
供養之相。準大通道前之文。足證此義。今佛光相
無此者。彌勒偈畧耳。防難偈中亦云。示諸佛土衆
寶嚴淨。是今昔所現。道前之相同也。○又見下。成
道說法。自然成佛道者。謂功圓行滿。一念相應。習
氣頓斷。任運而成。非謂無修無證。有濫外計。身色
句受用身也。舍那金軀。巍然晃耀。故如金山。無量
相海。皆悉具足。故曰端嚴。不共凡小所見。故云微
妙。土以寶嚴。身如金山。身土相依。故如琉璃龕中。
現真金像也。大衆。卽華嚴海會。佛於其中。敷普賢

行門。演遮那性海。羣機絕分。名深法義。準彌勒偈云。又覩諸佛。聖主師子。卽此中又見諸如來四句。演說經典。微妙第一。卽此中如淨琉璃中四句。是今昔所現。成道說法同也。從實竟。 二施權

一一諸佛土。聲聞衆無數。因佛光所照。悉見彼大衆。首二句。舉機該教。如今佛光相中。說聲聞乘同。下二句。大衆二字。義該緣覺菩薩。與今佛光相中。說緣覺菩薩乘同。準前彌勒若人遭苦等偈。卽此科義也。從實施權竟。

二會權歸實分三 一進戒二度二施忍二度三

禪慧二度 初

或有諸比丘。在於山林中。精進持淨戒。猶如護明珠。在山林中者。離欲絕塵。易辦道故。精進持戒者。以精進爲先鋒。以持戒爲主帥。破煩惱敵。護法身命。故輪王頂上明珠。最所珍護。而菩薩護戒若彼。故云猶如護明珠也。 二施忍二度

又見諸菩薩。行施忍辱等。其數如恒沙。斯由佛光照。菩薩行施。內外無恚。非具大忍辱者不能。故并列之。餘可知。 三禪慧二度

又見諸菩薩。深入諸禪定。身心寂不動。以求無上道。

○又見諸菩薩。知法寂滅相。各於其國土。說法求佛道。

初禪度。深入者。揀非初修。內外俱寂。故曰身心不動。以斯求道。真受道之器也。○後四句。慧度。實智。觀法。了法無相。故云寂滅。既知是已。於國演說。借利物以成已德。故曰求道。頌放光東照竟。

四頌會衆騰疑

畧頌

爾時四部衆。見日月燈佛。現大神通力。其心皆歡喜。各各自相問。是事何因緣。

長行以本稱。故云二十億菩薩。樂欲聽法。偈頌以

迹論故云爾時四部衆見神通力已知爲瑞故心皆歡喜未論何緣故各自相問各自相問者謂各以此事存諸內而問諸心也。

五頌說法授記分二 一頌出定說法二頌唱滅

授記

初

此與長行義同
文別屬義頌也。

天人所奉尊適從三昧起讚妙光菩薩汝爲世間眼一切所歸信能奉持法藏如我所說法惟汝能證知。○世尊旣讚歎令妙光歡喜說是法華經。○滿六十小劫不起於此座所說上妙法是妙光法師悉皆能受持。

初所被之機。大聖出世。人天奉敬尊崇。名所奉尊。適猶方也。謂時節既至。方從定起也。讚妙光者。將以大法饒益。安其心故。智慧充足。以斯道覺斯民。故曰爲世間眼。道德全備。聞而敬。見而親。故曰一切歸信。如斯之人。乃能代佛宣揚。故曰奉持法藏。此讚其利他德也。如我所說者。通指一代教典。非妙光不能體證。非妙光不能了知。故曰惟汝能證知。此讚其自利德也。準長行。從文殊口中叙出。此中借燈明語句說來。長行云。八百弟子。明歸信者衆。此中云。一切歸信。顯弟子之多。長行偈頌。文別

義同。○世尊下。能被之教。妙光歡喜。非爲讚歎。故喜。以讚歎必說法故。說是法華。非爲歡喜。故說。以歡喜必信受故。問。今佛出定。何無讚歎身子之語。答。想應有之。以非正義。經家不叙。今叙之者。欲與長行。變其文勢耳。○滿六下。會遇時節。準長行有

三義。一說無異座。二聽無異席。三時衆不懈。今缺後二。乃補出妙光受持。義互顯也。然上文燈明讚。以能奉持。能證知。今妙光果能受持。則燈明可謂知人。而妙光可謂不負所知矣。頌出定說法竟。

二頌唱滅授記分二 一頌對衆唱滅二頌授記

潛輝

初

此科廣於長行。兼補後四句。屬廣頌。兼補頌也。

佛說是法華。令衆歡喜已。○尋卽於是日。告於天人衆。諸法實相義。已爲汝等說。我今於中夜。當入於涅槃。○汝一心精進。當離於放逸。諸佛甚難值。億劫時一遇。

首二句。結前。令衆歡喜者。喜非尋常。乃心生大歡喜。自知當作佛也。○尋卽下。正明。告於天人者。畧梵魔沙門。及婆羅門等故。實相妙理。徧在諸法。故云諸法實相。如云是法住法位是也。法華會上。頭顯示。故曰已爲汝說。如云世間相常住是也。說已卽唱滅者。令生渴仰。并息憍恣故。○後四句。誠

勉補頌

汝一二句。卽誠以令息憍恣。放逸卽憍恣也。

諸佛二句。卽誠以令生渴仰。難值故渴仰也。

二頌授記潛輝

準長行惟二義。一授記德藏。二記已潛輝。今補前後三義。而二義之

文。仍與長行不類。屬補頌。兼義頌也。

世尊諸子等。聞佛入涅槃。各各懷悲惱。佛滅一何速。

○聖主法之王。安慰無量衆。我若滅度時。汝等勿憂怖。○是德藏菩薩。於無漏實相。心已得通達。其次當作佛。號曰爲淨身。亦度無量衆。○佛此夜滅度。如薪盡火滅。分布諸舍利。而起無量塔。○比丘比丘尼。其數如恒沙。倍復加精進。以求無上道。

初時衆悲惱

補頌

諸子卽四衆人等。旣受佛化。俱得

稱子故。悲謂悲佛入滅。惱謂惱自無依。又悲者悲

佛入滅之速。惱者惱自進修之遲。一猶獨也。言諸

佛應世。會必有離。但今佛入滅。獨何速疾若是。此

悲惱之不容已也。○聖主下。如來安慰

補頌

聖主見

前。法之王者。於諸法中得自在故。安慰者。如來見

其悲惱過分。有至淚如波羅奢伽華者。故用善言

安撫。順意而慰諭之。汝等句。正安慰之語。言汝等

勿以佛滅爲憂。勿以無依爲怖也。○是德下。授記

德藏

義頌

無漏實相。約諸佛所證而言。言衆生雖具

實相。由煩惱染故。如器破漏。不堪復用。惟佛妄盡
理圓。乃稱無漏。今德藏菩薩。雖未成佛。然於無漏
實相。已能現量體悟。故云通達。餘可知。○佛此下
記已潛輝。義頌衆生機宜如薪。如來教化如火。機盡
化息。如薪盡火滅也。分布舍利。起無量塔者。表大
慈平等。至化普及之意。○比丘下。時衆回心。補頌數
如恒沙者。卽見佛滅度。心生渴仰。回小向大之衆。
然此衆向雖精進。未免依恃如來。間起憍厭。今見
佛滅無依。故倍加精求。欲作未來得度之緣。後云
諸佛滅度後。若人善軟心。如是諸衆生。皆已成佛。

道卽此類也。頌別明往事竟。

三頌結會古今分二 一頌師弟本因二頌結會
釋疑 初二 一頌文殊本因二頌彌勒本因

初

是妙光法師奉持佛法藏八十小劫中廣宣法華經。
○是諸八王子妙光所開化堅固無上道當見無數
佛。○供養諸佛已隨順行大道相繼得成佛轉次而
授記最後天中天號曰然燈佛諸仙之導師度脫無
量衆。

初妙光弘經法藏則曰奉持法華則曰廣宣者雖

諸經皆弘。惟法華爲重也。○是諸下八子受化。妙光之道得之燈明。傳之八子。父作子述。則妙光之繼往開來。有功於斯經久矣。○供養下極顯因深。供養佛已。福足也。隨順行道。慧足也。福慧雙足。故得相繼成佛。八子轉相傳述。次第授受。故云轉次授記。天中天者。統論天有四種。一世間天。如世國王。二生天。如三界諸天。三淨天。卽四果支佛。四義天。謂十住菩薩。見一切法是空義故。佛超四天。故稱天中之天。諸仙導師者。仙亦有四。一地仙。遷居山林。年老不死者。二天仙。三界諸天。飛行變化者。

三聖仙。四果支佛。神通自在者。四真仙。三賢十聖。分證真理者。佛化四仙。故稱諸仙導師。

二頌彌勒本因

廣頌

是妙光法師。時有一弟子。心常懷懈怠。貪着於名利。求名利無厭。多遊族姓家。棄捨所習誦。廢忘不通利。以是因緣故。號之爲求名。○亦行衆善業。得見無數佛。供養於諸佛。隨順行大道。具六波羅密。今見釋師子。其後當作佛。號名曰彌勒。廣度諸衆生。其數無有量。

初抑其名利役心。懈怠者。妨正之賊。心常懷之。則

進修日弛矣。名利者。鈎心之媒。貪而着之。則營逐日深矣。營逐日深。自致貪求無厭。多遊族姓之家。進修日弛。必至棄捨習誦。廢忘不能通利。據此則惟慕虛名。不務真修。故曰。以是因緣。號爲求名。○亦行下。揚其種善。值佛所求名利。俱資檀度。故曰行衆善業。見佛復供者。因福積福。隨順行道者。因慧修慧。慧深則般若易滿。福厚則五度可成。故云具六波羅密也。佛出釋氏。九十六種捲舌。故稱釋師子。以多劫曾供養故。今得見也。現爲補處。故云後當作佛。因果俱以彌勒稱者。酌宿願故。準上生

經云。凡釋迦末法中。精修功德。掃塔塗地。乃至稱
名禮拜者。命終皆上生兜率。當來隨彌勒下生。今
云廣度衆生等。蓋卽此耳。又因中隨佛行道。結緣
已深。故果中說法度生。其數無量。所謂當熟者熟。
當脫者脫也。彌勒應化偈云。彌勒真彌勒。化身千
百億。時時示時人。時人自不識。可爲此段作一註
脚。頌師弟本因竟。

二頌結會釋疑

彼佛滅度後。懈怠者汝是。妙光法師者。今則我身是。
佛滅度後等者。以懈怠之迹。彰著在佛滅度後。非

謂佛滅度後。乃有是人。又特約佛滅後言者。寓有釋疑之意。由菩薩於佛滅後。尚以懈怠見稱。燈明生前事迹。自應廢忘。今日之事。勿怪其不知而問也。頌結會古今竟。

四頌應問結答

長行總答而畧。此中別答而廣。屬廣頌。又古德於此立四伏疑。以釋

名宗體用。今以偈有四段。恰應彌勒勒前之四問。故以應問結答科之。分四 一答第

一問二答第二問三答第三問四答第四問 初

由前彌勒問云。四眾欣仰。瞻仁及我。世尊何故放斯光明。故應問而結答云。

我見燈明佛。本光瑞如此。以是知今佛。欲說法華經。
文殊意謂。汝問世尊何故放斯光明。若我往昔

所見燈明光瑞如此。後說法華。是知今佛亦欲說法華無疑。

二答第二問

由前彌勒問云。佛子時答。決疑令喜。何所饒益。演斯光明。故應問而結答。

云。

今相如本瑞。是諸佛方便。今佛放光明。助發實相義。文殊意謂。汝問何所饒益。演斯光明。若以今日之相觀之。如本光瑞無異。足知此光。佛佛皆同。是諸佛欲顯實相。先作方便。借萬八千土諸佛化儀。以助發之。則今佛放光。亦助發實相之義。

三答第三問

由前彌勒問云。佛坐道場。所得妙法。爲欲說此。爲當授記。故應問而結答。

云。

諸人今當知。合掌一心待佛。當雨法雨。充足求道者。文殊意謂。汝問爲說妙法。爲當授記。若以予測度。汝諸人等。今當合掌一心。虛懷而待。所以然者。佛當雨大法雨。充足求道之人。俾焦芽敗種。各得受記成佛。所謂說法授記者。盡在是矣。

四答第四問

由前彌勒問云。示諸佛土。衆寶嚴淨。及見諸佛。此非小緣。乃至爲說何等。

故應問而結答云。

諸求三乘人。若有疑悔者。佛當爲除斷。令盡無有餘。文殊意謂。汝前旣以此非小緣。必問爲說何等。想

諸求三乘人。未必信予所說。若仍有疑而未信。或
信而復悔者。待佛出定。當為除斷。自令淨盡無餘。
此是文殊入海事急。全將此事推向佛邊。致令如
來出定之後。不得不說。故為發起之端也。序分竟。
法華指掌疏卷一之上 終

音釋

驀

莫白切音陌。猶忽也。

鞞

都黎切音低。知也。義與譯同。

否

都鄙切音痞。閉塞也。 伺 申

切音詩。 咍

才笑切音咍。不吝也。

摩那多

此云下行。亦云意喜。 輾 尼展切音輾。

也

畬 以諸切音余。田二歲也。

砒磔

如雷之聲。上披耕切音磔。音砒。下克盍切音磔。 颺 移

切音陽。風所飛揚也。 垠

垠

田中高處也。上縷尹切音隴。

凹凸

上烏洽切。

音范低下也下徒磅礪地形也又廣大混同之貌
結切音迭高出也
音登蒙有眸子而失明也又見人而不自見也
泊
徐姊切音祀獸名似
偽五禾切音吡蛤蚌蜃屬雀
牛一角取喻猶豫
所化上葛合切音桎桎下姑沃切音鵠足械也
衾
衽音切音鵠章移切音黛度耐切音代畫眉
茶毘
欽大被也
支鳥名
髮黑而光淨也
此云火化以
碁渠之切音秩次序分明也
火化身也
碁圍碁也

信士弟子瓢金柱助銀一兩 福祿和助銀五錢

萬保住助銀五錢

李普興 李蘓勤 觀音保 周七十四

姜承廣 上各助銀三錢

釋子航如募錢一千七百 璽光捐銀五錢


隆一心興助銀一兩 洪宗性寬助銀一兩

吉祥寺曇雲 觀音庵凝然 華嚴寺廣澤

關帝廟慧光 興隆寺慧燈 慈慧殿達瑞

安樂堂德 上各助銀三錢

寶公寺福修助錢一千 同助刻



寺... 銀... 萬...

寺... 銀... 萬...

寺... 銀... 萬...

寺... 銀... 萬...

寺... 銀... 萬...

寺... 銀... 萬...

寺... 銀... 萬...

寺... 銀... 萬...

寺... 銀... 萬...

寺... 銀... 萬...

寺... 銀... 萬...

